



# **PERSATUAN BOLASEPAK MALAYSIA** *STATUT*

---

EDISI 2020

**KANDUNGAN**

	Mukasurat
<b>STATUT</b>	<b>6 – 49</b>
<b>PERATURAN YANG MENGAWAL PENGGUNAAN STATUT FAM</b>	<b>50 – 53</b>
<b>PERATURAN TETAP KONGRES FAM</b>	<b>54 – 56</b>

**STATUT**

<b>TAKRIF</b>	<b>6</b>
---------------	----------

**BAHAGIAN I PERUNTUKAN AM**

Artikel 1	Nama, Ibu Pejabat dan Badan Sah	9
Artikel 2	Objektif	9
Artikel 3	Kekecualian dan Tiada Diskriminasi	10
Artikel 4	Memupuk Hubungan Persahabatan	10
Artikel 5	Pemain	10
Artikel 6	Undang-undang Permainan	11
Artikel 7	Tatalaku Badan dan Pegawai	11
Artikel 8	Pegawai yang Hilang Kelayakan	11
Artikel 9	Bahasa Rasmi	11

**BAHAGIAN II KEAHLIAN**

Artikel 10	Penerimaan Masuk, Penggantungan dan Pemecatan	12
Artikel 11	Penerimaan Masuk	12
Artikel 12	Permintaan dan Prosedur Permohonan	13
Artikel 13	Hak Ahli	13
Artikel 14	Obligasi Ahli	14
Artikel 15	Penggantungan	15
Artikel 16	Pemecatan	16
Artikel 17	Pemberhentian	16
Artikel 18	Statut Kelab, Persatuan Negeri dan Kumpulan Kelab yang Lain	16

**BAHAGIAN III      PRESIDEN KEHORMAT DAN AHLI KEHORMAT**

Artikel 19	Presiden Kehormat Dan Ahli Kehormat	18
------------	-------------------------------------	----

**BAHAGIAN IV      ORGANISASI**

Artikel 20	Peraturan Organisasi FAM	19
Artikel 21	Badan	19

**A. Kongres**

Artikel 22	Takrif dan Komposisi Kongres	20
Artikel 23	Perwakilan dan Undian	20
Artikel 24	Bidang Kuasa	21
Artikel 25	Kuorum Kongres	21
Artikel 26	Keputusan Kongres	22
Artikel 27	Pemilihan	22
Artikel 28	Kongres Biasa	23
Artikel 29	Agenda Kongres Biasa	23
Artikel 30	Kongres Luar Biasa	24
Artikel 31	Pindaan Kepada Statut (Peraturan Yang Mengawal Penggunaan Statut dan Peraturan Tetap Kongres)	25
Artikel 32	Minit Kongres	25
Artikel 33	Tarikh Keputusan Berkuatkuasa	25

**B. Jawatankuasa Eksekutif**

Artikel 34	Komposisi	26
Artikel 35	Mesyuarat dan Keputusan	27
Artikel 36	Kuasa Jawatankuasa Eksekutif	27
Artikel 37	Pemecatan Seseorang atau Sesebuah Badan	29

**C. Presiden**

Artikel 38	Presiden	30
Artikel 39	Calon bagi Jawatan Presiden	30
Artikel 40	Wakil dan Tandatangan	31

**D. Jawatankuasa Darurat**

Artikel 41	Jawatankuasa Darurat	32
------------	----------------------	----

**E. Jawatankuasa Tetap**

Artikel 42	Jawatankuasa Tetap	33
Artikel 43	Jawatankuasa Kewangan dan Pengurusan	34
Artikel 44	Jawatankuasa Pengurusan Pasukan Bolasepak Kebangsaan	34
Artikel 45	Jawatankuasa Pertandingan	34
Artikel 46	Jawatankuasa Undang-undang	35
Artikel 47	Jawatankuasa Pengadil	35
Artikel 48	Jawatankuasa Audit Dalam	35
Artikel 49	Jawatankuasa Bolasepak Wanita	35
Artikel 50	Jawatankuasa Futsal dan Bolasepak Pantai	35
Artikel 51	Jawatankuasa Perubatan dan Sains Sukan	35
Artikel 52	Jawatankuasa Status	35
Artikel 53	Jawatankuasa Media, Komunikasi dan Perhubungan Awam	36
Artikel 54	Jawatankuasa Keselamatan	36
Artikel 55	Jawatankuasa Integriti	36
Artikel 56	Jawatankuasa Tiket dan Stadium	36
Artikel 57	Jawatankuasa Teknikal dan Pembangunan	37
Artikel 58	Jawatankuasa Penajaan dan Pemasaran	37
Artikel 59	Jawatankuasa Ad-Hoc	37
Artikel 60	Badan Perlesenan Kelab	37
Artikel 61	Jawatankuasa Pemilihan	37

**F. Sekretariat Agung**

Artikel 62	Sekretariat Agung	38
Artikel 63	Setiausaha Agung	38
Artikel 64	Bendahari	39

**G. Badan Kehakiman**

Artikel 65	Badan Kehakiman	40
Artikel 66	Jawatankuasa Tatatertib	40
Artikel 67	Jawatankuasa Rayuan	40
Artikel 68	Langkah Tatatertib	41
Artikel 69	Timbang Tara	42
Artikel 70	Bidang Kuasa	42
Artikel 71	Mahkamah Timbang Tara Sukan	43

**BAHAGIAN V KEWANGAN**

Artikel 72	Tempoh Kewangan	44
Artikel 73	Pendapatan	44
Artikel 74	Perbelanjaan	45
Artikel 75	Juruaudit Bebas	45
Artikel 76	Yuran Keahlian	45
Artikel 77	Penyelesaian	45
Artikel 78	Levi	45
Artikel 79	Harta	46

**BAHAGIAN VI PERUNTUKAN AKHIR**

Artikel 80	Fasal Tafsiran	47
Artikel 81	Keadaan Luar Jangka yang Tidak Diduga dan Force Majeure	47
Artikel 82	Sumbangan kepada Media	47
Artikel 83	Pembubaran	48
Artikel 84	Notis Mesyuarat	48
Artikel 85	Kuorum bagi Mesyuarat	48
Artikel 86	Kehadiran dalam Mesyuarat	49
Artikel 87	Perkara yang Tidak Dinyatakan	49
Artikel 88	Penguatkuasaan	49

Mukasurat

**PERATURAN YANG MENGAWAL PENGGUNAAN STATUT FAM**

Artikel 1	Penerbitan Dan Pindaan Kepada Peraturan	50
Artikel 2	Konflik Kepentingan	50
Artikel 3	Pertandingan	50
Artikel 4	Hak	51
Artikel 5	Pengesahan	52
Artikel 6	Perlawanan Dan Pertandingan Antarabangsa	52
Artikel 7	Hubungan	52
Artikel 8	Kelulusan	52
Artikel 9	Perantara Dan Ejen Perlawanan	52
Artikel 10	Undang-Undang Permainan	53
Artikel 11	Hal-Hal Yang Tidak Diperuntukkan	53
Artikel 12	Penguatkuasaan	53

**PERATURAN TETAP KONGRES FAM**

Artikel 1	Pengerusi	54
Artikel 2	Langkah Tatatertib	54
Artikel 3	Pemilihan Pegawai	54
Artikel 4	Perintah Prosedur	55
Artikel 5	Cadangan Dan Usul	55
Artikel 6	Undian	55
Artikel 7	Pemilihan	56
Artikel 8	Perkara Yang Tidak Dinyatakan	56
Artikel 9	Penguatkuasaan	56

**TAKRIF**

Ungkapan yang diberikan di bawah mempunyai makna seperti yang berikut:

1. **FAM** bermakna Persatuan Bolasepak Malaysia yang didaftarkan oleh Pesuruhjaya Sukan Malaysia dan merupakan ahli kepada AFC dan FIFA.
2. **FIFA** bermakna “*Federation Internationale de Football Association*” atau dalam Bahasa Malaysia ialah Persekutuan Bolasepak Antarabangsa.
3. **AFC** bermakna “*Asian Football Confederation*” atau dalam Bahasa Malaysia ialah Konfederasi Bolasepak Asia, iaitu sekumpulan persatuan bolasepak yang diiktiraf oleh FIFA dan berada di benua yang sama (atau kawasan geografi yang sama).
4. **AFF** bermakna “*Asean Football Federation*” atau dalam Bahasa Malaysia ialah Persekutuan Bolasepak Asean.
5. **Statut** bermakna Statut atau perlembagaan semasa FAM.
6. **Persatuan Bolasepak Negeri (PBN)** bermakna persatuan bolasepak negeri yang diiktiraf dan menjadi Ahli FAM mengikut Artikel 11, Statut FAM.
7. **Persatuan Bolasepak Daerah, Jajahan dan Bahagian (PBD)** bermakna persatuan bolasepak di peringkat daerah yang diiktiraf dan menjadi ahli kepada PBN.
8. **Kelab** bermakna organisasi bolasepak yang berdaftar dengan PJS dan/atau Suruhanjaya Syarikat Malaysia (SSM) mengikut Akta Syarikat 2016 yang sedang berkuatkuasa dan dibenarkan untuk menyertai pertandingan Bolasepak yang dianjurkan atau diiktiraf oleh FAM.
9. **Pasukan** bermakna pasukan bolasepak dan termasuklah pasukan Ahli, PBN, PBD, Kelab dan pasukan jemputan yang menyertai Pertandingan yang dianjurkan atau diiktiraf oleh FAM.
10. **Pertandingan** bermakna pertandingan Bolasepak di peringkat kebangsaan, negeri atau daerah yang dianjurkan atau diiktiraf oleh FAM dan mengikut Undang-Undang Permainan yang disiarkan oleh IFAB dan Peraturan.
11. **Pesuruhjaya Sukan (PJS)** bermakna Pesuruhjaya Sukan yang dilantik di bawah Akta Pembangunan Sukan 1997 (Akta 576).
12. **Kongres** bermakna badan tertinggi FAM.
13. **Jawatankuasa Eksekutif** bermakna badan eksekutif FAM.
14. **Pegawai** bermakna semua ahli Jawatankuasa Eksekutif, Jawatankuasa Darurat, Jawatankuasa Tetap, Jawatankuasa Ad-Hoc, Badan Kehakiman FAM, Ahli, PBN, PBD, Kelab dan kakitangan termasuklah juga pegawai pertandingan, pegawai



pasukan dan sesiapa sahaja yang diberikan kuasa untuk menjalankan tugas bagi pihak FAM, Ahli, PBN, PBD, Kelab atau Pasukan dalam Aktiviti Bolasepak.

15. **Bolasepak** bermakna permainan bolasepak termasuklah futsal, bolasepak pantai dan aktiviti bolasepak wanita serta lain-lain permainan Bolasepak yang dikawal oleh FIFA dan dianjurkan atau diiktiraf oleh FIFA, AFC, AFF, FAM, Ahli, PBN atau PBD menurut Undang-Undang Permainan berkenaan yang disiarkan oleh IFAB dan Peraturan FIFA, AFC dan FAM.
16. **Aktiviti Bolasepak** bermakna penglibatan FAM, Ahli, PBN, PBD, Kelab, Pegawai, Pemain dan mana-mana individu yang terlibat dalam aktiviti berkenaan Bolasepak yang dianjurkan atau diiktiraf oleh FIFA, AFC, AFF atau FAM serta termasuklah aktiviti-aktiviti pentadbiran, pengurusan kesukanan bolasepak serta aktiviti yang bersampingan dengannya.
17. **Pegawai Pertandingan** bermakna mana-mana individu yang layak dan diberi kuasa oleh FAM atau Ahli atau PBD untuk mengelolakan Pertandingan dan perlawanan yang dianjurkan atau diluluskan oleh FAM.
18. **Pegawai Pasukan** bermakna mana-mana individu yang layak untuk mewakili Ahli, PBN, PBD, Kelab atau Pasukan yang telah disahkan penyertaan dalam Pertandingan atau Aktiviti Bolasepak yang dianjurkan atau diluluskan oleh FAM.
19. **Pemain** bermakna pemain bolasepak warganegara Malaysia yang telah disahkan pendaftaran menyertai Aktiviti Bolasepak di Malaysia tertakluk kepada Peraturan FAM.
20. **Pemain Asing** bermakna Pemain yang bukan warganegara Malaysia yang telah didaftarkan dengan Pasukan untuk menyertai Aktiviti Bolasepak di Malaysia dan tertakluk dengan Peraturan FIFA dan FAM.
21. **Presiden** bermakna Presiden FAM pada masa itu yang dilantik menurut Artikel 38 Statut ini.
22. **Setiausaha Agung** bermakna Setiausaha Agung FAM pada masa itu yang dilantik menurut Artikel 63 Statut ini.
23. **Bendahari** bermakna Bendahari FAM pada masa itu yang dilantik menurut Artikel 64 Statut ini.
24. **Sekretariat Agung** bermakna urus setia FAM di bawah penyeliaan Setiausaha Agung.
25. **Ahli** bermakna ahli yang diterima masuk mengikut Artikel 11, Statut ini.
26. **IFAB** bermakna “*International Football Association Board*” atau dalam Bahasa Malaysia ialah Lembaga Persatuan Bolasepak Antarabangsa.



27. **Mahkamah Biasa** bermakna mahkamah yang mendengar pertikaian awam dan undang-undang persendirian.
  28. **Tribunal Timbang Tara** bermakna mahkamah berkecuali yang bebas dan ditubuhkan dengan sewajarnya yang tidak bertindak seperti mahkamah biasa.
  29. **CAS** bermakna “*Court of Arbitration for Sport (Tribunal Arbitral du Sport)*” atau dalam bahasa Malaysia ialah Mahkamah Timbang Tara Sukan yang berpusat di Lausanne, Switzerland; atau mana-mana Tribunal Timbang Tara yang diiktiraf di bawah Undang-Undang Malaysia yang semasa.
  30. **Peraturan** bermakna Peraturan FAM iaitu statut, kod, peraturan-peraturan, undang-undang kecil, kaedah, arahan, garis panduan dan termasuklah pekeliling yang dikeluarkan oleh FAM atau diluluskan oleh Jawatankuasa Darurat, Jawatankuasa Tetap, Jawatankuasa Ad-hoc dan Badan Kehakiman FAM.
  31. **Media** bermakna media cetak, media elektronik, media alaf baru atau media maya dan termasuklah semua yang bekerja atau terlibat dalam sebarang aktiviti media atau lain-lain aktiviti yang berkaitan dengan media.
  32. **Perantara** bermakna mana-mana individu yang telah mendaftarkan diri dengan FAM dan mempunyai kontrak dengan Pemain dan/atau Pasukan untuk menguruskan semua perkara berkenaan Pemain serta tertakluk kepada syarat-syarat yang ditetapkan oleh FAM.
- Nota: Ungkapan yang merujuk orang sebenar termasuklah kedua-dua jantina. Mana-mana ungkapan dalam bentuk mufrad hendaklah terpakai kepada bentuk jamak dan sebaliknya.

**BAHAGIAN I PERUNTUKAN AM****Artikel 1 Nama, Ibu Pejabat dan Badan Sah**

1. FAM ialah sebuah persatuan yang didaftarkan sewajarnya dengan Pejabat Pesuruhjaya Sukan Malaysia menurut Akta Pembangunan Sukan 1997. Penubuhannya adalah untuk suatu jangka masa yang tidak ditetapkan.
2. Ibu pejabat FAM dan tempat urusannya yang berdaftar terletak di Wisma FAM, Tingkat 3, Jalan SS 5A/9, Kelana Jaya, 47301 Petaling Jaya, Selangor, Malaysia dan boleh dipindahkan ke satu tempat yang lain hanya selepas resolusi diluluskan oleh Kongres.
3. FAM merupakan ahli FIFA dan AFC.
4. Warna FAM hendaklah warna kuning dan hitam yang sama dengan warna harimau Malaysia.
5. Lambang FAM hendaklah terdiri daripada seekor harimau Malaysia, sebiji bola dan dua bilah keris dengan perkataan “F.A. Malaysia” dan “Persatuan Bolasepak Malaysia” tertera padanya.

**Artikel 2 Objektif**

Objektif FAM adalah:

1. untuk sentiasa menambah baik, menggalak, menyelaraskan dan mengawal permainan bola sepak di seluruh wilayah Malaysia berdasarkan permainan yang adil dan mempunyai nilai penyatuan, pendidikan, budaya dan kemanusiaan, khususnya melalui program belia dan pembangunan;
2. untuk mengatur pertandingan Bolasepak FAM dalam semua bentuk pada peringkat Kebangsaan, dengan menentukan secara tepat, seperti yang dikehendaki, bidang tanggungjawab yang diserahkan kepada pelbagai Liga yang membentuknya;
3. untuk merangka Peraturan dan peruntukan serta memastikan penguatkuasaannya;
4. untuk melindungi kepentingan Ahli dan PBD;
5. untuk menghormati dan mengelakkan berlakunya apa-apa pelanggaran Peraturan, arahan atau keputusan FIFA, AFC, AFF dan FAM atau Undang-Undang Permainan dan untuk memastikan kesemuanya ini juga dihormati oleh Ahli atau PBN atau PBD atau Kelab;
6. untuk menggalakkan integriti, etika dan “*fair play*” dengan objektif untuk mengelakkan semua kaedah atau amalan seperti rasuah, penyalahgunaan dadah atau manipulasi perlawanan yang mungkin menjejaskan integriti perlawanan,



- pertandingan, Pemain, Pegawai dan Ahli atau menimbulkan penyalahgunaan sukan Bolasepak;
7. untuk mengawal dan menyelia semua Aktiviti Bolasepak dalam semua bentuk yang dilulus dan direstui oleh FAM di seluruh Malaysia;
  8. untuk menguruskan hubungan dalam kesukanan antarabangsa yang berkaitan dengan Bolasepak dalam semua bentuknya;
  9. untuk menjadi tuan rumah dalam pertandingan di peringkat antarabangsa dan peringkat yang lain;
  10. untuk bergabung atau bekerjasama dengan mana-mana organisasi, Kelab atau badan selain daripada Ahli yang mempunyai semua atau mana-mana objektifnya yang sama dengan mana-mana objektif FAM;
  11. untuk membantu Ahli dengan apa jua cara bagi menggalakkan atau meneruskan segala atau mana-mana objektif Ahli tersebut seperti yang difikirkan sesuai oleh Kongres.

### **Artikel 3      Kekecualian dan Tiada Diskriminasi**

1. FAM berkecuali dalam perkara politik dan agama.
2. Apa jua jenis diskriminasi terhadap sesebuah negara, individu atau kumpulan disebabkan oleh keturunan etnik, jantina, bahasa, agama, politik atau apa-apa sebab lain adalah dilarang sama sekali dan boleh dihukum dengan penggantungan atau pemecatan.

### **Artikel 4      Memupuk Hubungan Persahabatan**

1. FAM hendaklah memupuk hubungan persahabatan antara Ahli, Kelab, Pegawai dan Pemainnya serta dalam masyarakat untuk tujuan kemanusiaan.
2. Setiap individu dan organisasi yang terlibat dalam permainan Bolasepak terikat untuk mematuhi Peraturan dan prinsip permainan yang adil serta prinsip kesetiaan, keutuhan dan semangat kesukanan.
3. FAM akan menyediakan cara bagi menyelesaikan apa-apa pertikaian dalaman yang mungkin timbul dalam kalangan Ahli, PBN, Kelab, Pegawai, Pemain, Perantara dan ejen perlawanan yang sah kepada institusi berkenaan.

### **Artikel 5      Pemain**

1. Status Pemain dan peruntukan bagi perpindahan dan kontrak mereka hendaklah dikawal selia oleh Jawatankuasa Eksekutif dan/atau Jawatankuasa Status FAM mengikut peraturan khas yang digubal oleh Jawatankuasa Eksekutif dan berpandukan Peraturan FIFA dan FAM yang berkuatkuasa.



2. Status Pemain Asing dan peruntukan bagi perpindahan mereka hendaklah dikawal selia oleh Jawatankuasa Eksekutif dan/atau Jawatankuasa Status FAM mengikut Peraturan Status dan Perpindahan Pemain FIFA dan FAM yang berkuatkuasa.
3. Pemain hendaklah didaftarkan menurut Peraturan.

#### **Artikel 6 Undang-Undang Permainan**

1. FAM dan setiap Ahlinya hendaklah mematuhi Undang-Undang Permainan yang dikeluarkan oleh IFAB. Hanya IFAB boleh menyediakan dan mengubah Undang-Undang Permainan.

#### **Artikel 7 Tatalaku Badan dan Pegawai**

Badan dan Pegawai mestilah mematuhi Statut, Peraturan, arahan, keputusan dan kod seperti yang ditetapkan oleh FIFA, AFC, AFF dan FAM semasa melaksanakan Aktiviti Bolasepak.

#### **Artikel 8 Pegawai yang Hilang Kelayakan**

Individu berikut tidak layak dilantik dan tidak boleh bertindak sebagai Pegawai jika:

1. Individu yang dalam pendakwaan atas tuduhan termasuk tetapi tidak terhad kepada rasuah, pecah amanah, penyalahgunaan dadah, pemalsuan, penipuan dan memanipulasi perlawanan; atau
2. Individu yang disabitkan kesalahan yang dinyatakan dalam perenggan (1) di atas dalam tempoh lima (5) tahun yang lalu dari tarikh disabitkan kesalahan atau dalam tempoh lima (5) tahun dari tarikh menjalani hukuman.
3. Individu yang dikenakan tindakan bankrap yang belum dilepaskan.
4. Perenggan 1 hingga 3 juga terpakai kepada Pemain.

#### **Artikel 9 Bahasa Rasmi**

1. Bahasa Malaysia ialah bahasa rasmi FAM. Dokumen dan surat rasmi ditulis dalam bahasa Malaysia, kecuali bagi urusan dengan FIFA, AFC dan lain-lain persatuan bolasepak yang menjadi ahli kepada FIFA dan AFC atau peringkat antarabangsa hendaklah menggunakan Bahasa Inggeris. Jika terdapat apa-apa percanggahan dalam tafsiran dan terjemahan dalam Bahasa Malaysia mengenai Undang-Undang permainan atau apa-apa teks atau dokumen rasmi yang dikeluarkan oleh FIFA dan AFC maka teks bahasa Inggeris hendaklah digunakan dan dianggap sah.
2. Bahasa Malaysia dan/atau Bahasa Inggeris boleh digunakan dalam Kongres.
3. Laporan Kongres dan laporan tahunan aktiviti FAM hendaklah ditulis dalam Bahasa Malaysia.

**BAHAGIAN II KEAHLIAN****Artikel 10 Penerimaan Masuk, Penggantungan dan Pemecatan**

1. Kongres hendaklah membuat keputusan sama ada hendak menerima masuk, menggantung atau memecat Ahli.
2. Penerimaan menjadi Ahli boleh diberikan jika pemohon memenuhi keperluan FAM.
3. Keahlian ditamatkan melalui pemberhentian atau pemecatan. Kehilangan keahlian tidak melepaskan Ahli daripada obligasi kewangannya terhadap FAM atau Ahli FAM yang lain tetapi menyebabkan pembatalan segala hak berhubung dengan FAM.

**Artikel 11 Penerimaan Masuk**

1. Ahli hendaklah terdiri daripada yang berikut:
  - i) Persatuan Bolasepak Negeri;
  - ii) Persatuan Bolasepak Polis Diraja Malaysia;
  - iii) Persatuan Bolasepak Angkatan Tentera;
  - iv) Persatuan Bolasepak Melayu Malaysia;
  - v) Majlis Sukan India Malaysia;
  - vi) Persatuan Bolasepak Cina Malaysia;
  - vii) Persatuan Jurulatih Bolasepak Malaysia;
  - viii) Mana-mana persatuan bolasepak di peringkat kebangsaan yang didaftarkan sewajarnya di bawah Akta Pembangunan Sukan 1997 yang sedang berkuatkuasa di Malaysia seperti yang diluluskan oleh Kongres mengikut budi bicaranya.
2. Mana-mana persatuan yang ingin menjadi Ahli hendaklah memohon secara bertulis kepada Sekretariat Agung.
3. Permohonan mestilah disertakan bersama dengan butir-butir wajib berikut:
  - i) satu salinan statut atau peraturannya yang sah di sisi undang-undang;
  - ii) satu pengakuan bahawa ia akan sentiasa mematuhi Statut, Peraturan dan undang-undang, arahan, keputusan, dan Kod FAM, AFC, AFF dan FIFA dan memastikan bahawa ini juga akan dipatuhi oleh Ahli, Kelab, Pegawai dan Pemain;
  - iii) satu pengakuan bahawa ia akan mematuhi Undang-Undang Permainan yang berkuatkuasa dan disiarkan oleh IFAB;



- iv) satu pengakuan bahawa ia mengiktiraf Tribunal Timbang Tara yang sedang berkuatkuasa di Malaysia dan Mahkamah Timbang Tara Sukan (CAS) di Lausanne, seperti yang ditetapkan dalam Statut ini;
- v) satu pengakuan bahawa ia terletak di Malaysia dan didaftarkan sewajarnya dengan pejabat PJS;
- vi) satu pengakuan bahawa ia akan bermain dalam semua perlawanan tempatan rasmi di Malaysia;
- vii) satu pengakuan yang bermaksud bahawa komposisi undang-undang pemohon menjamin bahawa ia boleh membuat keputusan secara bebas tanpa dipengaruhi oleh mana-mana entiti luar;
- viii) satu senarai Pegawai yang menetapkan mereka menjadi penandatangan yang dibenarkan dengan hak untuk mengikat perjanjian yang sah dengan pihak ketiga;
- ix) satu pengakuan bahawa ia akan mengaku janji untuk menganjurkan atau turut serta dalam perlawanan persahabatan hanya setelah mendapat kebenaran FAM terlebih dahulu;
- x) satu salinan minit mesyuarat kongres atau mesyuarat agung dan perlembagaan yang terakhir.
- xi) suatu pengakuan bahawa ia tidak akan membawa perkara berkaitan tafsiran dan aplikasi Statut, Peraturan, keputusan dan arahan FIFA, AFC, AFF dan FAM ke Mahkamah Biasa, melainkan jika diperuntukkan oleh peraturan FIFA, AFC, AFF dan FAM.

4. Perkara ini tidak akan menjejaskan status Ahli yang sedia ada.

#### **Artikel 12 Permintaan dan Prosedur Permohonan**

- 1. Prosedur bagi penerimaan masuk hendaklah dikawal selia melalui peraturan khas yang diluluskan oleh Jawatankuasa Eksekutif.
- 2. Jawatankuasa Eksekutif hendaklah memohon Kongres sama ada untuk menerima masuk ataupun tidak permohonan tersebut.
- 3. Ahli baharu hendaklah memperolehi hak dan tugas keahliannya sebaik sahaja ia diterima menjadi Ahli. Wakilnya layak mengundi dan dipilih, yang berkuat kuasa serta-merta.

**Artikel 13 Hak Ahli**

1. Ahli mempunyai hak berikut:
  - i) untuk mengambil bahagian dalam Kongres, untuk mengetahui agendanya terlebih dahulu, untuk dipanggil ke Kongres dalam tempoh yang ditetapkan dan untuk menjalankan hak mengundi mereka;
  - ii) untuk membuat usul bagi dimasukkan dalam agenda Kongres;
  - iii) untuk menamakan calon bagi semua badan FAM yang hendak dipilih;
  - iv) untuk mengetahui tentang hal ehwal FAM melalui badan rasmi FAM;
  - v) untuk mengambil bahagian dalam Aktiviti Bolasepak dan/atau aktiviti sukan lain yang dianjurkan dan diiktiraf oleh FAM;
  - vi) untuk melaksanakan segala hak lain yang timbul daripada Statut dan Peraturan lain FAM.
2. Pelaksanaan hak ini tertakluk kepada peruntukan lain dalam Statut ini dan Peraturan yang terpakai.

**Artikel 14 Obligasi Ahli**

1. Ahli mempunyai obligasi berikut:
  - i) untuk mematuhi sepenuhnya Statut, Peraturan, arahan dan keputusan FIFA, AFC, AFF dan FAM pada setiap masa dan untuk memastikan perkara ini juga dipatuhi oleh ahlinya;
  - ii) untuk memastikan pemilihan badan pembuat keputusannya;
  - iii) untuk mengambil bahagian dalam Aktiviti Bolasepak yang dianjurkan atau diiktiraf oleh FAM;
  - iv) untuk membayar yuran keahliannya;
  - v) untuk menghormati Undang-Undang Permainan dan Undang-undang Permainan Futsal dan Bolasepak Pantai seperti yang ditetapkan oleh IFAB dan untuk memastikan undang-undang ini dipatuhi oleh ahlinya melalui peruntukan statutori;
  - vi) untuk menerima pakai satu klausa statutori yang menetapkan bahawa jika terdapat apa-apa pertikaian yang memerlukan timbangtara yang melibatkan FAM atau seorang daripada ahlinya dan ianya berkaitan dengan Statut, peraturan, arahan dan keputusan FIFA, AFC, AFF dan/atau FAM, bahawa perkara ini akan jatuh di bawah bidang kuasa Tribunal Timbang Tara yang diiktiraf oleh FIFA, AFC, AFF dan/atau FAM dan sebarang rujukan kepada Mahkamah Biasa adalah dilarang;



- vii) untuk memastikan statutenya sehaluan dengan peruntukan Statut FAM. Setiap pindaan statut Ahli mestilah mendapat kelulusan daripada FAM sebelum dibentang dalam kongres Ahli dan sebelum dikemukakan kepada PJS. Ahli hendaklah menyampaikan kepada FAM apa-apa pindaan pada statut dan peraturannya dan juga senarai para Pegawai atau orang yang menjadi penandatanganan yang dibenarkan dengan hak untuk mengikat perjanjian yang sah dengan pihak ketiga;
  - viii) untuk tidak mengadakan apa-apa hubungan yang bersifat kesukuan dengan entiti yang tidak diiktiraf atau dengan Ahli yang telah digantung atau dipecat;
  - ix) untuk mematuhi prinsip kesetiaan, keutuhan dan semangat kesukuan yang baik sebagai pernyataan bagi permainan yang adil melalui peruntukan statutori;
  - x) untuk mematuhi butir-butir wajib yang dinyatakan di bawah Artikel 11 perenggan 3 sepanjang keahliannya;
  - xi) untuk menyimpan daftar Ahli yang dikemas kini dari semasa ke semasa;
  - xii) untuk mengemukakan kepada Setiausaha Agung, pada atau sebelum 30 April setiap tahun, akaun tahunan yang diaudit sewajarnya berhubung dengan geran tahunan yang dibuat oleh FAM;
  - xiii) untuk mematuhi sepenuhnya segala kewajipan lain yang timbul daripada Statut dan Peraturan FIFA, AFC, AFF dan FAM; dan
  - xiv) untuk menganjurkan pertandingan bagi ahli atau kelab di bawah kawasannya.
2. Pelanggaran obligasi yang dinyatakan di atas oleh mana-mana Ahli boleh menyebabkan tindakan diambil seperti yang diputuskan oleh Jawatankuasa Tatatertib.

### **Artikel 15 Penggantungan**

1. Kongres bertanggungjawab menggantung keahlian mana-mana Ahli. Walau bagaimanapun, Jawatankuasa Eksekutif boleh menggantung Ahli yang melanggar obligasinya sebagai Ahli secara serius dengan berkuat kuasa serta-merta. Penggantungan ini akan berakhir sehingga Kongres berikutnya, melainkan Jawatankuasa Eksekutif menarik balik penggantungan itu.
2. Penggantungan keahlian hendaklah disahkan oleh Kongres berikutnya dengan majoriti tiga per empat (3/4) daripada undi yang dibuat. Jika tidak disahkan, maka penggantungan itu ditarik balik secara automatik.
3. Ahli yang digantung akan kehilangan hak keahliannya. Ahli lain tidak boleh mengadakan hubungan kesukuan dengan Ahli yang digantung tersebut. Jawatankuasa Tatatertib boleh mengenakan sekatan yang selanjutnya.



4. Ahli yang tidak turut serta dalam Aktiviti Bolasepak FAM bagi sekurang-kurangnya dua (2) daripada semua Aktiviti Bolasepak sepanjang satu tempoh selama empat (4) tahun berturut-turut melainkan dikecualikan atas budi bicara Kongres hendaklah digantung daripada mengundi dalam Kongres, dan wakilnya tidak akan dipilih atau dilantik sehingga Ahli itu telah menunaikan obligasinya dalam hal ini.
5. Ahli yang masih belum membayar yurannya pada 1 Januari setiap tahun kalendar tidak akan lagi menjadi Ahli FAM. Walau bagaimanapun, pada bila-bila masa setelah bayaran tunggakan itu dibuat, keahlian Ahli boleh dikembalikan semula mengikut budi bicara Kongres.

**Artikel 16 Pemecatan**

1. Kongres boleh memecat Ahli jika:
  - i) gagal memenuhi obligasi kewangannya terhadap FAM;atau
  - ii) melanggar secara serius Statut, Peraturan FAM, arahan atau keputusan FIFA, AFC, AFF dan FAM.
2. Kehadiran majoriti mutlak Ahli (50% + 1) yang layak mengundi dalam Kongres diperlukan bagi mengesahkan pemecatan, dan usul pemecatan mestilah diterima dengan majoriti tiga per empat (3/4) daripada undi sah yang dibuat.

**Artikel 17 Pemberhentian**

1. Ahli boleh berhenti daripada FAM dengan berkuatkuasa pada akhir setiap tahun kalendar. Notis pemberhentian keahlian mestilah dihantar kepada Sekretariat Agung tidak lewat daripada enam bulan sebelum berakhir tahun kalendar.
2. Pemberhentian adalah tidak sah sehingga Ahli yang hendak berhenti itu telah memenuhi obligasi kewangannya terhadap FAM dan Ahli-ahli FAM yang lain.

**Artikel 18 Status Kelab, Persatuan Negeri dan kumpulan kelab yang lain**

1. PBD, Kelab atau mana-mana kumpulan kelab yang lain yang bergabung dengan FAM atau Ahli hendaklah terletak di bawah dan diiktiraf oleh FAM. Statut ini menentukan skop kuasa dan hak serta tugas Kelab dan kumpulan ini. Statut dan peraturan persatuan bagi kumpulan itu mestilah diluluskan oleh Jawatankuasa Eksekutif.
2. Kelab dan kumpulan kelab yang bergabung dengan FAM atau Ahli atau PBN atau PBD hendaklah membuat segala keputusan tentang apa-apa perkara berkenaan dengan keahlian mereka tanpa bergantung pada mana-mana badan luar. Obligasi ini terpakai tanpa mengambil kira struktur korporat kelab tersebut.



3. Walau bagaimanapun, tiada orang sebenar ataupun orang di sisi undang-undang (termasuk syarikat pemegangan dan subsidiari) yang akan mengawal lebih daripada satu Kelab atau kumpulan apabila keutuhan mana-mana permainan atau Pertandingan mungkin terjejas.
4. FAM tidak akan bertanggung jawab bagi komitmen kewangan Ahli, PBN, PBD dan Kelab. Ahli, PBN, PBD atau Kelab bertanggung jawab bagi kelakuan dan komitmen kewangan masing-masing terhadap FIFA, AFC, AFF dan FAM.

**BAHAGIAN III      PRESIDEN KEHORMAT DAN AHLI KEHORMAT****Artikel 19      Presiden Kehormat dan Ahli Kehormat**

1.      Kongres boleh mengurniakan gelaran Presiden Kehormat atau Ahli Kehormat kepada mana-mana individu kerana khidmatnya yang patut dipuji dalam Bolasepak.
2.      Jawatankuasa Eksekutif akan membuat penamaan ini.
3.      Presiden Kehormat atau Ahli Kehormat boleh mengambil bahagian dalam Kongres. Mereka boleh menyertai perdebatan tetapi tidak boleh mengundi.

**BAHAGIAN IV ORGANISASI****Article 20 Peraturan Organisasi FAM**

Jawatankuasa Eksekutif hendaklah mewujudkan Peraturan Organisasi FAM sebagai sokongan dan tambahan kepada Statut ini seperti yang dikehendaki.

**Artikel 21 Badan**

1. Kongres ialah badan tertinggi FAM.
2. Jawatankuasa Eksekutif ialah badan Eksekutif FAM.
3. Presiden.
4. Jawatankuasa Darurat.
5. Jawatankuasa Tetap dan Ad-Hoc hendaklah menasihati dan membantu Jawatankuasa Eksekutif dalam menjalankan tugasnya. Tugas, komposisi dan fungsi Jawatankuasa Tetap dan Ad-Hoc ini hendaklah ditakrifkan di dalam Statut dan mengikut Peraturan Organisasi FAM.
6. Sekretariat Agung ialah urus setia FAM di bawah penyeliaan Setiausaha Agung..
7. Badan Kehakiman ialah Jawatankuasa Tatatertib dan Jawatankuasa Rayuan.
8. Badan Pelesenan Kelab adalah badan yang bertanggung jawab ke atas sistem pelesenan kelab di FAM.
9. Jawatankuasa Pemilihan adalah badan yang bertanggung jawab bagi menguruskan dan menyelia proses pemilihan.
10. Badan FAM hendaklah dipilih atau dilantik oleh FAM sendiri tanpa apa-apa pengaruh luar dan menurut prosedur yang diberikan dalam Statut ini.

**A. KONGRES****Artikel 22 Takrif dan Komposisi Kongres**

1. Kongres ialah mesyuarat di mana semua Ahli bersidang secara tetap. Kongres mewakili badan tertinggi FAM. Hanya Kongres yang bersidang mengikut prosedur sewajarnya mempunyai kuasa untuk membuat keputusan.
2. Kongres boleh terdiri sama ada daripada Kongres Biasa ataupun Kongres Luar Biasa.
3. Presiden hendaklah mengendalikan urusan Kongres mengikut Peraturan Tetap Kongres.
4. Kongres boleh melantik pemerhati yang mengambil bahagian dalam Kongres tetapi tidak mempunyai hak untuk berdebat atau mengundi.
5. Presiden Kehormat atau Ahli Kehormat boleh mengambil bahagian dalam Kongres. Mereka boleh turut serta dalam perdebatan tetapi tidak boleh mengundi.

**Artikel 23 Perwakilan dan Undian**

1. Kongres terdiri daripada perwakilan berikut:

i) Persatuan Bolasepak Negeri	-	dua (2) perwakilan
ii) Persatuan Bolasepak Polis Diraja Malaysia	-	dua (2) perwakilan
iii) Persatuan Bolasepak Angkatan Tentera	-	dua (2) perwakilan
iv) Persatuan Bolasepak Melayu Malaysia	-	dua (2) perwakilan
v) Majlis Sukan India Malaysia	-	dua (2) perwakilan
vi) Persatuan Bolasepak Cina Malaysia	-	dua (2) perwakilan
vii) Persatuan Jurulatih Bolasepak Malaysia	-	dua (2) perwakilan
viii) Mana-mana Ahli lain yang diterima masuk di bawah Artikel 11.1	-	dua (2) perwakilan
2. Perwakilan mestilah daripada Ahli yang mereka wakili dan dipilih dan/atau dilantik oleh badan tertentu bagi Ahli tersebut. Perwakilan juga mestilah mengemukakan bukti jika diminta.
3. Setiap Perwakilan dalam kategori Ahli yang sama mempunyai jumlah undi yang sama dalam Kongres. Hanya Perwakilan yang hadir layak mengundi. Undi melalui proksi atau surat tidak dibenarkan.



4. Jawatankuasa Eksekutif, Setiausaha Agung dan Bendahari hendaklah mengambil bahagian dalam Kongres tanpa hak mengundi. Semasa memegang jawatan, ahli Jawatankuasa Eksekutif tidak boleh dilantik sebagai perwakilan bagi mana-mana Ahli.

#### **Artikel 24 Bidang Kuasa**

Kongres mempunyai bidang kuasa berikut:

1. menerima pakai atau meminda Statut, Peraturan yang mengawal penggunaan Statut dan Peraturan Tetap Kongres;
2. melantik tiga (3) ahli untuk memeriksa minit mesyuarat;
3. memilih seorang (1) Presiden, dua (2) Timbalan Presiden, empat (4) Naib Presiden dan sepuluh (10) ahli yang mana dua (2) sahaja diperuntukkan untuk wanita;
4. melantik Jawatankuasa Pemilihan berdasarkan cadangan Jawatankuasa Eksekutif;
5. meluluskan penyata kewangan yang telah diaudit oleh juruaudit FAM;
6. meluluskan laporan aktiviti FAM;
7. melantik juruaudit bebas atas cadangan Jawatankuasa Eksekutif;
8. membuat keputusan di atas cadangan Jawatankuasa Eksekutif sama ada untuk mengurniakan gelaran Presiden Kehormat atau Ahli Kehormat;
9. menerima masuk, menggantung atau memecat Ahli;
10. menerima, menolak atau membatalkan cadangan yang dikemukakan oleh Ahli dan Jawatankuasa Eksekutif;
11. membubarkan FAM mengikut Artikel 83;
12. meluluskan minit mesyuarat yang lalu; dan
13. membuat keputusan bagi perkara-perkara yang tidak diperuntukan di dalam Statut.

#### **Artikel 25 Kuorum Kongres**

1. Kuorum Kongres adalah (50% + 1) daripada Ahli yang layak mengundi.
2. Jika tidak cukup kuorum, Kongres yang kedua hendaklah diadakan dalam tempoh tujuh (7) hari selepas Kongres pertama dengan agenda yang sama.
3. Tidak perlu cukup kuorum dalam mesyuarat kedua melainkan mana-mana butiran dalam agenda mencadangkan pindaan Statut FAM, pemilihan Presiden, Timbalan Presiden, Naib Presiden dan ahli Jawatankuasa Eksekutif, pembuangan satu atau beberapa Ahli, pemecatan Ahli atau pembubaran FAM.

**Artikel 26 Keputusan Kongres**

1. Majoriti mudah adalah daripada Ahli yang hadir dan layak mengundi sudah mencukupi untuk mengesahkan sesuatu pengundian itu kecuali ditetapkan berlainan oleh Statut. Bilangan undi sah yang dikira hendaklah menentukan majoriti.
2. Undi rosak atau undi kosong atau apa-apa tindakan tidak mengundi hendaklah diketepikan semasa mengira majoriti.
3. Sesuatu keputusan yang memerlukan undi hendaklah dicapai dengan mengangkat tangan. Jika pengundian secara mengangkat tangan tidak menghasilkan majoriti nyata yang menyokong sesuatu usul itu, maka pengundian itu hendaklah dibuat dengan cara memanggil nama mengikut abjad.

**Article 27 Pemilihan**

1. Kod Pemilihan FAM hendaklah mentadbir mana-mana Kongres pemilihan FAM.
2. Tatacara undian adalah seperti berikut:
  - i) Calon yang mendapat undi terbanyak iaitu majoriti mudah bagi undian yang direkodkan adalah sah dalam pemilihan semasa Kongres tersebut.
  - ii) Jika calon yang mendapat undi terbanyak menarik diri selepas undian, maka calon yang mendapat undi kedua terbanyak yang direkodkan adalah sah dipilih semasa Kongres tersebut.
  - iii) Jika dua (2) atau lebih calon mendapat undi tertinggi yang sama untuk memenuhi kuota Jawatankuasa Eksekutif ini, maka undian kedua hendaklah diadakan khas untuk calon-calon berkenaan sahaja.
  - iv) Dalam pemilihan kedua, calon atau calon-calon yang mendapat undi terendah akan disingkirkan dari pemilihan jawatan.
  - v) Jika undian masih lagi tidak berkeputusan, maka Kongres yang bersidang akan memutuskan apa-apa kaedah yang sesuai untuk memutuskan calon yang dipilih dimana keputusan tersebut adalah muktamad.
3. Pengerusi dan Ahli Jawatankuasa Pemilihan hendaklah dilantik oleh Kongres berdasarkan cadangan Jawatankuasa Eksekutif.



4. Setiap calon hendaklah mendapat jumlah pencalonan minimum dari Ahli mengikut jawatan yang ditandingi seperti berikut:
  - i) Presiden FAM - enam (6) pencalonan
  - ii) Timbalan Presiden FAM - lima (5) pencalonan
  - iii) Naib Presiden FAM - empat (4) pencalonan
  - iv) Ahli Jawatankuasa Eksekutif - dua (2) pencalonan

**Artikel 28 Kongres Biasa**

1. Kongres Biasa hendaklah diadakan setiap tahun. Kongres atau Mesyuarat Agung Ahli hendaklah diadakan secara tahunan.
2. Jawatankuasa Eksekutif hendaklah menetapkan tarikh, tempat dan masa. Ahli hendaklah diberitahu secara bertulis sekurang-kurangnya empat puluh lima (45) hari terlebih dahulu.
3. Mesyuarat Jawatankuasa Eksekutif hendaklah diadakan sebelum tarikh Kongres. Mesyuarat ini hendaklah mengandungi agenda, laporan tahunan, penyata kewangan yang telah diaudit dan mana-mana dokumen lain yang berkaitan.

**Artikel 29 Agenda Kongres Biasa**

1. Setiausaha Agung hendaklah merangka agenda berdasarkan cadangan daripada Jawatankuasa Eksekutif dan Ahli. Apa-apa cadangan yang ingin dikemukakan oleh Ahli kepada Kongres hendaklah dihantar ke Sekretariat Agung secara bertulis, dengan disertakan penjelasan ringkas, selewat-lewatnya dalam masa tujuh (7) hari selepas tarikh Kongres dimaklumkan.
2. Agenda Kongres hendaklah termasuk butir-butir seperti berikut:
  - i) mengisytiharkan Kongres sudah dimulakan dan dibentuk menurut Statut FAM;
  - ii) meluluskan agenda;
  - iii) ucapan Presiden;
  - iv) melantik Ahli untuk memeriksa minit mesyuarat;
  - v) melantik Jawatankuasa Pemilihan FAM;
  - vi) menggantung atau memecat Ahli (jika berkenaan);
  - vii) meluluskan minit Kongres yang lalu;
  - viii) melaporkan aktiviti tahunan (yang mengandungi aktiviti sejak Kongres yang lalu);



- ix) meluluskan penyata kewangan yang telah diaudit mengandungi:
  - a. kunci kira-kira, dan
  - b. penyata pendapatan dan perbelanjaan
- x) menerima masuk Keahlian (jika berkenaan);
- xi) menerima cadangan untuk meminda Statut, Peraturan Mengawal Penggunaan Statut dan Peraturan Tetap Kongres (jika berkenaan);
- xii) membincangkan cadangan yang dikemukakan oleh Ahli dan Jawatankuasa Eksekutif;
- xiii) melantik juruaudit bebas (jika berkenaan) berdasarkan cadangan Jawatankuasa Eksekutif;
- xiv) melantik pemegang amanah berdasarkan cadangan Jawatankuasa Eksekutif;
- xv) memecat individu atau badan (jika berkenaan);
- xvi) pemilihan:
  - a) Presiden FAM;
  - b) dua (2) Timbalan Presiden FAM;
  - c) empat (4) Naib Presiden FAM
  - d) lapan (8) Ahli Jawatankuasa Eksekutif FAM;
  - e) dua (2) Ahli Jawatankuasa Eksekutif Wanita FAM.

### **Artikel 30 Kongres Luar Biasa**

1. Jawatankuasa Eksekutif boleh mengadakan Kongres Luar Biasa pada bila-bila masa.
2. Jawatankuasa Eksekutif hendaklah mengadakan Kongres Luar Biasa jika tiga per empat (3/4) daripada Ahli membuat permintaan bertulis. Permintaan ini hendaklah menetapkan butiran agenda. Kongres Luar Biasa perlu diadakan dalam tempoh tiga (3) bulan selepas menerima permintaan bertulis tersebut. Jika Kongres Luar Biasa tidak diadakan dalam tempoh itu, Ahli yang membuat permintaan itu boleh mengadakan Kongres itu sendiri. Sebagai jalan terakhir, Ahli boleh meminta bantuan daripada FIFA.
3. Ahli hendaklah dimaklumkan tentang tempat, tarikh dan agenda sekurang-kurangnya sebulan sebelum berlangsungnya Kongres Luar Biasa.
4. Apabila Kongres Luar Biasa diadakan atas usaha Jawatankuasa Eksekutif, maka pihak Jawatankuasa Eksekutif mestilah merangka agenda. Apabila Kongres Luar Biasa



diadakan atas permintaan Ahli, maka agenda mestilah mengandungi butiran yang dibangkitkan oleh Ahli.

5. Agenda Kongres Luar Biasa tidak boleh dipinda.

### **Artikel 31 Pindaan kepada Statut (Peraturan Mengawal Penggunaan Statut dan Peraturan Tetap Kongres)**

1. Kongres bertanggungjawab meminda Statut, Peraturan Mengawal Penggunaan Statut dan Peraturan Tetap Kongres.
2. Apa-apa cadangan untuk meminda Statut mestilah dikemukakan secara bertulis berserta dengan penjelasan ringkas kepada Sekretariat Agung oleh Ahli atau Jawatankuasa Eksekutif. Cadangan yang dikemukakan oleh Ahli adalah sah, dengan syarat cadangan itu disokong secara bertulis oleh sekurang-kurangnya dua (2) Ahli yang lain.
3. Untuk meminda, meluluskan dan mengesahkan Statut sah diterima pakai majoriti mudah daripada Ahli yang hadir dan layak mengundi diperlukan.
4. Apa-apa cadangan untuk meminda Peraturan Mengawal Penggunaan Statut dan Peraturan Tetap Kongres mestilah dikemukakan secara bertulis berserta dengan penjelasan ringkas kepada Sekretariat Agung oleh Ahli atau Jawatankuasa Eksekutif.
5. Cadangan untuk meminda Peraturan Mengawal Penggunaan Statut dan Peraturan Tetap Kongres hendaklah diterima pakai hanya jika majoriti mudah Ahli yang hadir dan layak mengundi bersetuju.
6. Untuk memperkenalkan Peraturan Mengawal Penggunaan Statut dan Peraturan Tetap Kongres selari dengan FIFA dan AFC.

### **Artikel 32 Minit Kongres**

Setiausaha Agung bertanggungjawab untuk mencatat minit dalam Kongres. Minit Kongres hendaklah disemak oleh ahli yang dilantik dan diluluskan dalam Kongres berikutnya.

### **Artikel 33 Tarikh Keputusan Berkuatkuasa**

Keputusan yang diluluskan oleh Kongres hendaklah mula berkuatkuasa ke atas Ahli 30 hari selepas penutupan Kongres, melainkan Kongres menetapkan tarikh lain bagi keputusan itu berkuatkuasa.

**B. JAWATANKUASA EKSEKUTIF****Artikel 34 Komposisi**

1. Jawatankuasa Eksekutif terdiri daripada tujuh belas (17) Ahli:
  - i) Presiden;
  - ii) Dua (2) Timbalan Presiden;
  - iii) Empat (4) Naib Presiden;
  - iv) Sepuluh (10) ahli yang mana dua (2) diperuntukkan untuk wanita.
2. Jawatankuasa Eksekutif hendaklah dipilih oleh Kongres dan setiap calon mestilah dicadangkan mengikut Artikel 27 (4) Statut ini.
3. Tempoh perkhidmatan Jawatankuasa Eksekutif adalah selama empat (4) tahun. Mereka boleh dipilih semula.
4. Pada mesyuarat pertama Jawatankuasa Eksekutif, Presiden hendaklah menamakan salah seorang Timbalan Presiden yang akan bertanggungjawab sekiranya Presiden tidak hadir mesyuarat.
5. Jawatankuasa Eksekutif hendaklah aktif dalam Bolasepak dan mempunyai tempat tinggal di Malaysia.
6. Hanya Ahli boleh mencadangkan calon bagi Jawatankuasa Eksekutif. Ahli hendaklah menyerahkan nama calon secara bertulis kepada Sekretariat Agung bagi jawatan Presiden, Timbalan Presiden, Naib Presiden dan ahli Jawatankuasa. Pencalonan mestilah dihantar kepada Sekretariat Agung sekurang-kurangnya satu (1) bulan sebelum tarikh Kongres. Jawatankuasa Pemilihan akan memohon pengesahan daripada calon sama ada menerima pencalonan atau tidak dan jika sekiranya bersetuju calon hendaklah mengemukakan persetujuan melalui borang yang disediakan oleh Sekretariat Agung dalam masa lima belas (15) hari sebelum Kongres bersama-sama surat akuan menyatakan bahawa calon adalah tidak tertakluk kepada Artikel 8, Statut ini.
7. Tertakluk kepada Artikel 34 (6), sekiranya calon tidak bersetuju dengan pencalonan atau calon gagal untuk mengesahkan penerimaan pencalonan atau calon masih terikat dengan Artikel 8 Statut ini, maka Jawatankuasa Pemilihan akan menggugurkan nama calon berkenaan daripada senarai pencalonan.
8. Jika sekiranya calon didapati memberikan pengakuan palsu berkaitan dengan Artikel 8 Statut ini, maka calon tersebut akan gugur secara automatik daripada senarai calon yang layak dan jika calon tersebut telah berjaya memegang mana-mana jawatan semasa pemilihan dalam Kongres, maka calon berkenaan akan gugur secara



automatik dan tidak boleh memegang sebarang jawatan atau menjadi Pegawai sekurang-kurangnya lima (5) tahun.

9. Senarai rasmi calon mestilah diserahkan kepada Ahli sekurang-kurangnya tujuh (7) hari sebelum tarikh Kongres bersama dengan agenda Kongres yang pada masa itu Jawatankuasa Eksekutif akan dipilih.
10. Jawatankuasa Eksekutif tidak boleh, pada masa yang sama, menjadi ahli Badan Kehakiman FAM.
11. Jika terdapat kekosongan jawatan, Jawatankuasa Eksekutif bolehlah mengisi jawatan itu sehingga Kongres Biasa berikutnya, apabila pemilihan baharu akan dibuat bagi baki tempoh mandat tersebut.
12. Setiap pencalonan hendaklah sejajar dengan peruntukan lanjut yang terkandung di dalam Kod Pemilihan FAM.

### **Artikel 35 Mesyuarat dan Keputusan**

- 1) Jawatankuasa Eksekutif hendaklah menetapkan terma-terma rujukan Jawatankuasa Eksekutif, peraturan-peraturan untuk mesyuarat dan keupayaannya untuk membuat keputusan di bawah Peraturan Organisasi FAM.
- 2) Jawatankuasa Eksekutif hendaklah bermesyuarat sekurang-kurangnya tiga (3) kali setahun.
- 3) Setiausaha Agung mestilah menyusun agenda. Ahli Jawatankuasa Eksekutif boleh mencadangkan perkara untuk dimasukkan ke dalam agenda dan hendaklah mengemukakan perkara-perkara untuk dimasukkan ke dalam agenda mesyuarat kepada Sekretariat Agung sekurang-kurangnya empat belas (14) hari sebelum mesyuarat. Agenda tersebut bolehlah dihantar kepada ahli Jawatankuasa Eksekutif sekurang-kurangnya tujuh (7) hari sebelum mesyuarat.

### **Artikel 36 Kuasa Jawatankuasa Eksekutif**

Jawatankuasa Eksekutif:

1. hendaklah meluluskan keputusan tentang segala hal yang tidak termasuk dalam skop tanggungjawab Kongres atau yang tidak dikhaskan kepada badan lain mengikut undang-undang atau di bawah Statut;
2. hendaklah menyediakan dan mengadakan Kongres Biasa dan Luar Biasa FAM;
3. hendaklah melantik Pengerusi, Timbalan Pengerusi dan ahli Jawatankuasa Tetap;
4. hendaklah melantik Pengerusi, Timbalan Pengerusi dan ahli Badan Kehakiman;
5. mencadangkan Pengerusi dan ahli Jawatankuasa Pemilihan kepada Kongres.



6. boleh memutuskan untuk mewujudkan Jawatankuasa Ad-Hoc jika perlu pada bila-bila masa;
7. hendaklah meluluskan dan menyusun Peraturan bagi penubuhan Jawatankuasa Tetap dan Jawatankuasa Ad-Hoc;
8. hendaklah mencadangkan juruaudit bebas kepada Kongres;
9. hendaklah menetapkan tempat dan tarikh serta bilangan pasukan yang menyertai pertandingan FAM;
10. hendaklah melantik jurulatih bagi pasukan-pasukan dan kakitangan teknikal yang lain;
11. hendaklah meluluskan Peraturan yang menetapkan cara pentadbiran dalaman FAM;
12. hendaklah memastikan Statut digunakan dan menerima pakai persetujuan eksekutif yang dikehendaki untuk penggunaannya;
13. boleh memecat seseorang Pegawai atau sesebuah badan atau menggantung Ahli atau Pegawai buat sementara waktu sehigga Kongres berikutnya;
14. boleh mewakilkan tugas mengikut bidang kuasanya kepada badan FAM yang lain atau kepada pihak ketiga;
15. menggubal, meminda dan meluluskan Kod, peraturan-peraturan, undang-undang kecil, kaedah dan garis panduan yang telah disahkan oleh Jawatankuasa Darurat, Jawatankuasa Tetap, Jawatankuasa Ad-Hoc dan Badan Kehakiman FAM.

**Artikel 37 Pemecatan Seseorang atau Sesebuah Badan**

1. Kongres boleh memecat seseorang atau Pegawai atau sesebuah badan. Jawatankuasa Eksekutif boleh menggantikan individu atau Pegawai atau badan yang dipecat itu dalam agenda Kongres. Jawatankuasa Eksekutif juga boleh memecat seseorang atau Pegawai atau sesebuah badan secara sementara. Mana-mana ahli Jawatankuasa Eksekutif boleh mengemukakan cadangan untuk memasukkan usul bagi pemecatan tersebut ke dalam agenda Jawatankuasa Eksekutif atau Kongres.
2. Usul bagi pemecatan tersebut mestilah berasas. Pemecatan hendaklah dihantar kepada Ahli bersama dengan agenda tersebut.
3. Individu atau Pegawai atau badan yang berkenaan itu mempunyai hak untuk bersuara bagi membela diri.
4. Jika usul bagi pemecatan itu dibenarkan, maka Kongres atau Jawatankuasa Eksekutif hendaklah mencapai keputusan melalui undi sulit. Bagi meluluskan usul, majoriti dua per tiga ( $2/3$ ) daripada undi sah diperlukan.
5. Individu atau Pegawai atau badan yang dipecat (secara sementara) mestilah dilepaskan daripada fungsinya yang berkuatkuasa serta-merta.

**C. PRESIDEN****Artikel 38 Presiden**

1. Presiden mewakili FAM secara sah.
2. Presiden bertanggungjawab terutamanya untuk:
  - i) melaksanakan keputusan yang diluluskan oleh Kongres dan Jawatankuasa Eksekutif melalui Sekretariat Agung;
  - ii) memastikan FAM berfungsi secara efektif untuk mencapai objektif yang ditetapkan dalam Statut;
  - iii) menyelia kerja Sekretariat Agung;
  - iv) mewujudkan hubungan baik antara FAM dengan Ahlinya, FIFA, AFC, AFF badan politik dan organisasi lain.
3. Presiden boleh melantik atau memecat Setiausaha Agung dan Bendahari atas nasihat Jawatankuasa Eksekutif.
4. Presiden hendaklah mempengerusikan Kongres, mesyuarat Jawatankuasa Eksekutif dan Jawatankuasa Darurat serta mesyuarat jawatankuasa lain yang beliau dilantik sebagai Pengerusi.
5. Presiden hendaklah mempunyai satu undi biasa dalam Jawatankuasa Eksekutif dan apabila bilangan undi sama banyak, beliau hendaklah mempunyai undi pemutus.
6. Jika Presiden tidak hadir atau tidak ada, salah seorang Timbalan Presiden hendaklah menggantikan tempatnya.
7. Apa-apa kuasa tambahan Presiden hendaklah terkandung dalam Peraturan Organisasi FAM.

**Artikel 39 Calon bagi Jawatan Presiden**

1. Presiden hendaklah dipilih oleh Kongres untuk berkhidmat selama tempoh empat (4) tahun. Mandat ini bermula selepas tamat Kongres yang memilih mereka. Presiden, Timbalan Presiden, Naib Presiden boleh dipilih semula.
2. Bagi pemilihan jawatan Presiden, calon yang mendapat undi terbanyak selepas selesai proses pengiraan undi yang direkodkan akan menduduki jawatan tersebut. Jika dua (2) atau lebih calon mendapat undi tertinggi yang sama, maka undian yang kedua akan diadakan khas untuk calon-calon berkenaan sahaja. Calon yang mendapat bilangan undi paling rendah akan disingkirkan mulai undian kedua sehinggalah tinggal seorang calon sahaja.



3. Jika Presiden terhalang daripada menjalankan tugas rasminya samada secara tetap atau sementara, maka seorang Timbalan Presiden yang telah dinamakan hendaklah menggantikan beliau sehingga Kongres berikutnya. Kongres ini akan memilih Presiden baru, jika perlu.

**Artikel 40 Wakil dan Tandatangan**

Presiden mewakili FAM di sisi undang-undang dan berhak untuk menurunkan tandatangannya bagi pihak FAM. Jawatankuasa Eksekutif boleh merangka dalam Peraturan Organisasi FAM mengenai tandatangan bersama pegawai, khususnya, dalam kes ketiadaan Presiden dan berkaitan semua urusan-urusan penting FAM.

**D. JAWATANKUASA DARURAT****Artikel 41 Jawatankuasa Darurat**

1. Jawatankuasa Darurat hendaklah menangani segala perkara yang menghendaki penyelesaian segera antara dua mesyuarat Jawatankuasa Eksekutif. Jawatankuasa ini hendaklah terdiri daripada Presiden FAM, Timbalan Presiden FAM yang dinamakan dan tiga (3) ahli Jawatankuasa Eksekutif.
2. Presiden hendaklah mengadakan mesyuarat Jawatankuasa Darurat. Jika mesyuarat itu tidak dapat diadakan dalam tempoh masa yang tertentu, maka keputusan boleh diluluskan melalui cara komunikasi yang lain. Keputusan itu hendaklah berkuat kuasa serta-merta dan sah di sisi undang-undang. Presiden hendaklah segera memaklumkan kepada Jawatankuasa Eksekutif tentang keputusan yang diluluskan oleh Jawatankuasa Darurat itu.
3. Segala keputusan yang diambil oleh Jawatankuasa Darurat hendaklah dirujuk kepada Jawatankuasa Eksekutif berikutnya.

**E. JAWATANKUASA TETAP****Artikel 42 Jawatankuasa Tetap**

1. Jawatankuasa tetap terdiri daripada:
  - i) Jawatankuasa Kewangan dan Pengurusan;
  - ii) Jawatankuasa Pengurusan Pasukan Bolasepak Kebangsaan;
  - iii) Jawatankuasa Pertandingan;
  - iv) Jawatankuasa Undang-undang;
  - v) Jawatankuasa Pengadil;
  - vi) Jawatankuasa Audit Dalam;
  - vii) Jawatankuasa Bolasepak Wanita;
  - viii) Jawatankuasa Futsal dan Bolasepak Pantai;
  - ix) Jawatankuasa Perubatan dan Sains Sukan;
  - x) Jawatankuasa Status;
  - xi) Jawatankuasa Media, Komunikasi dan Perhubungan Awam;
  - xii) Jawatankuasa Keselamatan;
  - xiii) Jawatankuasa Integriti;
  - xiv) Jawatankuasa Tiket dan Stadium;
  - xv) Jawatankuasa Teknikal dan Pembangunan;
  - xvi) Jawatankuasa Pemasaran dan Penajaan; dan
  - xvii) Apa-apa jawatankuasa lain yang difikirkan perlu oleh Jawatankuasa Eksekutif.
2. Pengerusi dan Timbalan Pengerusi Jawatankuasa Tetap hendaklah terdiri daripada ahli Jawatankuasa Eksekutif kecuali Jawatankuasa Audit Dalam, Jawatankuasa Keselamatan dan Jawatankuasa Integriti.
3. Ahli atau Presiden boleh mencadangkan ahli bagi setiap Jawatankuasa Tetap yang mana akan diluluskan oleh Jawatankuasa Eksekutif. Pengerusi, Timbalan Pengerusi dan ahli Jawatankuasa Tetap hendaklah dilantik dalam tempoh selama empat (4) tahun.
4. Setiap Pengerusi hendaklah mewakili jawatankuasanya dan menjalankan urusannya dengan mematuhi Statut ini dan Peraturan Organisasi FAM yang dirangka oleh Jawatankuasa Eksekutif.



5. Setiap Pengerusi hendaklah menetapkan tarikh mesyuarat dengan kerjasama Setiausaha Agung dengan memastikan semua tugas dilaksanakan serta dilaporkan kepada Jawatankuasa Eksekutif.
6. Setiap jawatankuasa boleh mencadangkan pindaan terhadap terma rujukan di dalam Peraturan Organisasi FAM kepada Jawatankuasa Eksekutif.
7. Keputusan Jawatankuasa Tetap boleh dilaksanakan serta-merta kecuali diputuskan berlainan oleh Jawatankuasa Eksekutif.
8. Jika diperlukan, Jawatankuasa Tetap boleh menubuhkan Jawatankuasa-jawatankuasa kecil bagi menjalankan tugas khas seperti yang ditetapkan oleh jawatankuasa Tetap dengan syarat Jawatankuasa kecil tersebut hendaklah terlebih dahulu diluluskan oleh Jawatankuasa Eksekutif atau Jawatankuasa Darurat.

#### **Artikel 43 Jawatankuasa Kewangan dan Pengurusan**

Jawatankuasa Kewangan dan Pengurusan akan:

1. Bertanggungjawab dalam semua hal-hal pengurusan kewangan FAM dan pengurusan pentadbiran Sekretariat Agung serta menasihati Jawatankuasa Eksekutif di dalam perkara yang melibatkan kewangan dan pengurusan aset FAM.
2. Menganalisis bajet FAM (yang disediakan oleh Sekretariat Agung) dan penyata kewangan yang disediakan oleh Bendahari dan mengemukakannya kepada Jawatankuasa Eksekutif untuk kelulusan.

#### **Artikel 44 Jawatankuasa Pengurusan Pasukan Bolasepak Kebangsaan**

Pengerusi Jawatankuasa Pengurusan Pasukan Bolasepak Kebangsaan adalah Presiden FAM dan sebilangan ahli yang difikirkan perlu. Jawatankuasa Pengurusan Pasukan Bolasepak Kebangsaan bertanggungjawab terhadap semua aktiviti pengurusan pasukan kebangsaan termasuklah pemilihan Pegawai pengurusan pasukan, Pemain atau lain-lain Pegawai yang difikirkan perlu, mengatur program dan bertanggungjawab di atas kewangan yang mana hendaklah dirujuk kepada Jawatankuasa Kewangan dan Pengurusan sebelum perlaksanaan. Pengerusi Jawatankuasa ini atau Presiden FAM mempunyai kuasa pemutus yang mutlak mengenai semua aktiviti, pengurusan dan kewangan pasukan kebangsaan.

#### **Artikel 45 Jawatankuasa Pertandingan**

Jawatankuasa Pertandingan hendaklah:

1. bertanggungjawab merancang, menganjur, mengelola dan menangani semua hal berkaitan dengan Pertandingan mengikut peruntukan Statut ini dan Peraturan.
2. menganjurkan pertandingan antarabangsa dengan mematuhi peruntukan Statut ini dan Peraturan yang terpakai di bawah FIFA, AFC dan FAM.

3. mengurus dan mengendali segala perancangan, pelaksanaan dan pembangunan serta pendidikan yang berkaitan dengan Pertandingan.

**Artikel 46 Jawatankuasa Undang-Undang**

Jawatankuasa Undang-Undang hendaklah menganalisa isu-isu asas undang-undang yang berkaitan dengan bola sepak dan evolusi Statut dan Peraturan FAM dan ahli-ahlinya.

**Artikel 47 Jawatankuasa Pengadil**

Jawatankuasa Pengadil hendaklah:

1. melaksanakan Undang-Undang Permainan;
2. melantik pengadil untuk perlawanan dalam pertandingan yang dianjurkan oleh FAM dengan kerjasama pihak pentadbiran FAM dan mengawasi pengajaran dan latihan pengadil.
3. mengurus dan mengendali segala urusan yang berkaitan dengan kepengadilan.

**Artikel 48 Jawatankuasa Audit Dalam**

Jawatankuasa Audit Dalam hendaklah memastikan laporan perakaunan kewangan lengkap, berintegriti dan menyemak laporan juruaudit luar atas permintaan Jawatankuasa Eksekutif.

**Artikel 49 Jawatankuasa Bolasepak Wanita**

Jawatankuasa Bolasepak Wanita hendaklah bertanggungjawab ke atas semua perkara berkaitan dengan Aktiviti Bolasepak wanita.

**Artikel 50 Jawatankuasa Futsal dan Bolasepak Pantai**

Jawatankuasa Futsal dan Bolasepak Pantai hendaklah menguruskan semua aktiviti futsal dan bolasepak pantai dan menangani semua isu berkaitan dengan futsal dan bolasepak pantai.

**Artikel 51 Jawatankuasa Perubatan dan Sains Sukan**

Jawatankuasa Perubatan hendaklah menguruskan segala aspek perubatan bolasepak, sains sukan dan menguruskan semua hal-hal ujian dadah (doping).

**Artikel 52 Jawatankuasa Status**

1. Jawatankuasa Status hendaklah:
  - i) menubuhkan dan memantau pematuhan Peraturan Status dan Perpindahan Pemain FAM dan menentukan status Pemain untuk pelbagai pertandingan FAM. Bidang kuasa Jawatankuasa Status dikawal oleh Peraturan Status dan Perpindahan Pemain FAM dan FIFA. Peraturan FIFA mengenai Status dan Perpindahan Pemain boleh diguna pakai terhadap Pemain Asing.



- ii) bertanggungjawab bagi memastikan pematuhan Majlis Resolusi Pertikaian Kebangsaan (NDRC) berdasarkan Peraturan Status dan Perpindahan Pemain FAM dan FIFA dan Peraturan.
2. Jawatankuasa Status dan Majlis Resolusi Pertikaian Kebangsaan boleh menjatuhkan sekatan yang dijelaskan dalam Statut ini dan Peraturan Status dan Perpindahan Pemain FAM pada Ahli, PBN, PBD, Kelab, Pegawai, Pemain, Perantara dan ejen perlawanan.

### **Artikel 53 Jawatankuasa Media, Komunikasi dan Perhubungan Awam**

Jawatankuasa Media, Komunikasi dan Perhubungan Awam hendaklah menguruskan hal berkaitan dengan pihak media dalam acara FAM dan mengekalkan hubungan baik dengan organisasi media tempatan dan antarabangsa.

### **Artikel 54 Jawatankuasa Keselamatan**

1. Jawatankuasa Keselamatan hendaklah terdiri daripada Pengerusi iaitu Pengarah Keselamatan Dalam Negeri dan Ketenteraman Awam dan seberapa ramai ahli yang mungkin difikirkan perlu oleh Jawatankuasa Eksekutif.
2. Jawatankuasa Keselamatan bertanggungjawab:
  - i) untuk menyediakan garis panduan tentang keselamatan stadium bagi FAM dan Ahli;
  - ii) untuk menyelaraskan Peraturan Keselamatan di kalangan FAM dan Ahli;
  - iii) untuk membantu dalam pemeriksaan stadium dan padang permainan di mana permainan peringkat kebangsaan diadakan;
  - iv) untuk menasihati, memantau dan mengambil tindakan terhadap FAM dan Ahli dari semasa ke semasa tentang langkah keselamatan semasa perlawanan.

### **Artikel 55 Jawatankuasa Integriti**

Jawatankuasa Integriti hendaklah bertanggungjawab bagi pemeriksaan dan penyemakan semua Pemain dan juga untuk memerhatikan Ahli, PBD, Kelab, Pemain dan Pegawai untuk segala unsur-unsur yang tidak sihat dalam Aktiviti Bolasepak seperti rasuah dan mengatur perlawanan.

### **Artikel 56 Jawatankuasa Tiket dan Stadium**

Jawatankuasa Tiket dan Stadium hendaklah:

1. Menguruskan segala aspek berkaitan dengan tiket; dan
2. Mengendalikan isu-isu berkaitan pengurusan stadium.

**Artikel 57 Jawatankuasa Teknikal & Pembangunan**

Jawatankuasa Teknikal dan Pembangunan bertanggungjawab dalam penyeliaan dan pelaksanaan program-program pembangunan.

**Artikel 58 Jawatankuasa Pemasaran dan Penajaan**

Jawatankuasa Pemasaran dan Penajaan hendaklah:

1. mencorak hala tuju dan objektif pemasaran dan menetapkan strategi tanggungjawab sosial di FAM; dan
2. menguruskan hal berkaitan dengan pihak penaja dalam acara FAM dan mengekalkan hubungan baik dengan organisasi penaja.

**Artikel 59 Jawatankuasa Ad-Hoc**

Jawatankuasa Eksekutif boleh, jika perlu, mewujudkan Jawatankuasa Ad-Hoc bagi apa-apa tugas khas dalam tempoh yang tertentu. Jawatankuasa Eksekutif hendaklah melantik Pengerusi, Timbalan Pengerusi dan sebilangan ahli yang sesuai. Tugas dan fungsinya ditetapkan dalam Peraturan Khas yang dirangka oleh Jawatankuasa Eksekutif. Jawatankuasa Ad-Hoc ini melapor terus kepada Jawatankuasa Eksekutif. Jawatankuasa Ad-Hoc akan dibubarkan setelah menyelesaikan tugas atau seperti yang ditetapkan oleh Jawatankuasa Eksekutif.

**Artikel 60 Badan Pelesenan Kelab**

Badan Pelesenan Kelab yang membuat keputusan bertanggungjawab ke atas sistem pelesenan kelab di dalam FAM mengikut Peraturan-Peraturan Pelesenan Kelab FAM.

**Artikel 61 Jawatankuasa Pemilihan**

1. Jawatankuasa Pemilihan hendaklah mengurus dan menyelia proses pemilihan dan membuat semua keputusan berkaitan dengan pemilihan mengikut Kod Pemilihan FAM.

**F. SEKRETARIAT AGUNG****Artikel 62 Sekretariat Agung**

Sekretariat Agung hendaklah menjalankan segala kerja pentadbiran FAM di bawah arahan Setiausaha Agung. Anggota Sekretariat Agung terikat dengan Peraturan organisasi dalaman FAM dan hendaklah melaksanakan tugas yang diberikan dengan sebaik mungkin.

**Artikel 63 Setiausaha Agung**

1. Setiausaha Agung hendaklah dilantik oleh Presiden atas nasihat Jawatankuasa Eksekutif.
2. Setiausaha Agung ialah Ketua Eksekutif Sekretariat Agung.
3. Setiausaha Agung hendaklah dilantik berdasarkan perjanjian yang dikawal oleh undang-undang persendirian dan hendaklah mempunyai pengalaman yang diperlukan.
4. Setiausaha Agung bertanggungjawab:
  - i) untuk melaksanakan keputusan yang diluluskan oleh Kongres dan Jawatankuasa Eksekutif dengan mematuhi arahan Presiden;
  - ii) untuk menghadiri Kongres, Mesyuarat–mesyuarat Jawatankuasa Eksekutif, Jawatankuasa Darurat serta Jawatankuasa Tetap, Jawatankuasa Ad-Hoc dan Badan Kehakiman FAM;
  - iii) untuk menguruskan Kongres, Mesyuarat Jawatankuasa Eksekutif dan mesyuarat–mesyuarat lain;
  - iv) untuk menyusun minit Kongres, mesyuarat–mesyuarat Jawatankuasa Eksekutif, Jawatankuasa Darurat, Jawatankuasa Tetap, Jawatankuasa Sementara serta Jawatankuasa Ad-Hoc;
  - v) terhadap surat-menyurat FAM;
  - vi) terhadap hubungan dengan Ahli, jawatankuasa, FIFA, AFC dan AFF;
  - vii) untuk menguruskan Sekretariat Agung;
  - viii) melantik dan memecat kakitangan Sekretariat Agung;
  - ix) mencadangkan kakitangan pengurusan kepada Presiden.
5. Setiausaha Agung tidak boleh menjadi wakil Kongres atau ahli mana-mana badan FAM.
6. Kuasa tambahan Setiausaha Agung, termasuk kuasa yang jelas untuk mewakili FAM hendaklah terkandung dalam Peraturan Organisasi FAM.

**Artikel 64 Bendahari**

1. Bendahari hendaklah dilantik oleh Presiden atas nasihat Jawatankuasa Eksekutif.
2. Bendahari hendaklah menguruskan dan menyimpan akaun FAM dengan sempurna.
3. Bendahari bertanggungjawab untuk:
  - i) menyelia penyimpanan buku akaun dengan sempurna;
  - ii) menyerahkan penyata akaun bulanan;
  - iii) menyediakan Akaun Tahunan;
  - iv) membentangkan Akaun Tahunan dalam Kongres Tahunan; dan
  - v) menyerahkan akaun yang telah diaudit kepada Pesuruhjaya Sukan.
4. Semua akaun yang akan diserahkan kepada Kongres oleh Bendahari hendaklah mendapat kelulusan terlebih dahulu daripada Jawatankuasa Kewangan dan Pengurusan dan Jawatankuasa Eksekutif.

**G. BADAN KEHAKIMAN****Artikel 65 Badan Kehakiman**

1. Badan Kehakiman FAM terdiri daripada:
  - i) Jawatankuasa Tatatertib; dan
  - ii) Jawatankuasa Rayuan.
2. Tanggungjawab dan fungsi badan ini hendaklah ditetapkan dalam Kod Tatatertib FAM yang mematuhi Kod Tatatertib AFC dan FIFA.
3. Kuasa membuat keputusan bagi jawatankuasa yang lain kekal tidak berubah.
4. Ahli Badan Kehakiman tidak boleh menjadi ahli mana-mana Badan FAM yang lain pada masa yang sama.

**Artikel 66 Jawatankuasa Tatatertib**

1. Jawatankuasa Tatatertib hendaklah terdiri daripada Pengerusi, Timbalan Pengerusi dan beberapa orang ahli yang difikirkan perlu. Pengerusi dan Timbalan Pengerusi hendaklah mempunyai kelayakan undang-undang.
2. Fungsi badan ini hendaklah dikawal oleh Kod Tatatertib FAM. Jawatankuasa ini hendaklah meluluskan keputusan hanya apabila sekurang-kurangnya tiga (3) orang ahlinya hadir. Dalam kes tertentu, Pengerusi boleh membuat keputusannya sendiri menurut Kod Tatatertib FAM.
3. Jawatankuasa ini boleh mengumumkan sekatan yang dinyatakan dalam Statut ini dan Kod Tatatertib FAM terhadap Ahli, Pegawai, Pemain, Kelab dan Perantara serta ejen perlawanan.
4. Jawatankuasa Tatatertib akan melaksanakan dan menguatkuasakan apa-apa kod tatatertib yang dipinda oleh AFC atau FIFA.
5. Peruntukan ini tertakluk kepada kuasa Kongres dan Jawatankuasa Eksekutif berhubung dengan penggantungan dan pemecatan Ahli.

**Artikel 67 Jawatankuasa Rayuan**

1. Jawatankuasa Rayuan hendaklah terdiri daripada Pengerusi, Timbalan Pengerusi dan beberapa orang ahli yang difikirkan perlu. Pengerusi dan Timbalan Pengerusi hendaklah mempunyai kelayakan undang-undang.



2. Fungsi badan ini dikawal oleh Kod Tata tertib FAM. Jawatankuasa ini hendaklah meluluskan keputusan hanya apabila sekurang-kurangnya tiga (3) orang ahlinya hadir. Dalam kes tertentu, Pengerusi boleh membuat keputusannya sendiri menurut Kod Tata tertib FAM.
3. Jawatankuasa Rayuan bertanggungjawab untuk mendengar rayuan terhadap keputusan daripada Jawatankuasa Tata tertib dan Jawatankuasa Tetap yang tidak diisytiharkan sebagai muktamad.

### **Artikel 68 Langkah Tata tertib**

Langkah Tata tertib ini adalah semata-mata:

1. Untuk individu sebenar dan individu di sisi undang-undang:
  - i) amaran;
  - ii) teguran;
  - iii) denda;
  - iv) pemulangan anugerah.
2. Untuk individu sebenar:
  - i) amaran;
  - ii) pemecatan;
  - iii) penggantungan permainan;
  - iv) dilarang memasuki bilik persalinan dan/atau bangku Pemain simpanan;
  - v) dilarang memasuki stadium;
  - vi) dilarang mengambil bahagian dalam mana-mana aktiviti yang berkaitan dengan Bolasepak;
3. Untuk individu di sisi undang-undang:
  - i) larangan terhadap pemindahan;
  - ii) perlawanan bola tanpa Penonton;
  - iii) perlawanan bola di wilayah berkecuali;
  - iv) dilarang bermain di stadium tertentu;
  - v) pembatalan keputusan permainan;



- vi) pemecatan;
- vii) pelucutan hak;
- viii) pemotongan mata;
- ix) penurunan ke divisyen yang lebih rendah.

**Artikel 69 Timbang Tara**

1. Tribunal Timbang Tara berfungsi apabila:
  - i) Rayuan terhadap keputusan tertentu yang dibuat oleh Jawatankuasa Rayuan FAM boleh dirayu di Tribunal Timbang Tara yang bebas dan sewajarnya ditubuhkan menurut Akta Timbang Tara yang sedang berkuatkuasa di Malaysia oleh seorang penimbangtara yang dipersetujui bersama oleh pihak-pihak. Proses ini perlu diadakan di Malaysia dan keputusan Penimbang Tara adalah muktamad dan mesti diterima oleh semua pihak yang terlibat.
  - ii) Timbang tara hanya boleh dibuat selepas semua saluran dalaman yang lain telah digunakan sepenuhnya.
2. Kos prosiding bagi timbang tara akan ditanggung oleh pihak-pihak mengikut Akta Timbang Tara kini berkuatkuasa di Malaysia.

**Artikel 70 Bidang Kuasa**

1. FAM, Ahli atau Pasukan, Pegawai atau Pemain serta ejen perlawanan dan Perantara atau sesiapa sahaja seperti yang ditakrifkan di dalam Statut FAM tidak boleh membawa apa-apa jua pertikaianya ke mana-mana Mahkamah Biasa melainkan telah menggunakan semua hak yang diperuntukkan secara khusus dalam Statut ini atau Peraturan FAM, AFC atau FIFA. Apa-apa pertikaian hendaklah dikemukakan kepada bidang kuasa FAM, AFC atau FIFA.
2. FAM hendaklah mempunyai bidang kuasa terhadap pertikaian dalaman kebangsaan, iaitu pertikaian antara pihak yang menganggotai FAM. FIFA hendaklah mempunyai bidang kuasa terhadap pertikaian antarabangsa, iaitu pertikaian antara pihak yang menganggotai persatuan dan/atau gabungan yang berbeza.



3. Tertakluk kepada Artikel 70 (1), jika sekiranya Ahli atau Pasukan, Pegawai atau Pemain membawa apa-apa jua kes atau pertikaian ke mana-mana mahkamah, maka Ahli atau Pasukan akan lucut hak keahlian atau penyertaan Aktiviti Bolasepak yang ditetapkan oleh FAM secara automatik manakala Pegawai atau Pemain digantung seumur hidup dan tidak boleh menyertai sebarang Aktiviti Bolasepak di peringkat antarabangsa, kebangsaan, negeri, daerah. Ahli atau Pasukan, Pegawai atau Pemain hilang hak untuk merayu melainkan diputuskan sebaliknya oleh Kongres FAM.

#### **Artikel 71 Mahkamah Timbang Tara Sukan**

1. Menurut peruntukan yang berkaitan di dalam Statut FIFA, apa-apa rayuan terhadap keputusan FIFA yang muktamad dan terikat hendaklah didengar oleh Mahkamah Timbang Tara Sukan (CAS) di Lausanne, Switzerland untuk menyelesaikan pertikaian antara FIFA, Ahli atau Pasukan, Pemain, Pegawai dan Perantara serta ejen perlawanan. Walau bagaimanapun, CAS tidak boleh mendengar rayuan tentang pelanggaran Undang-Undang Permainan, penggantungan sehingga empat (4) permainan atau sehingga tiga (3) bulan, atau keputusan yang diluluskan oleh Tribunal Timbang Tara atau konfederasi yang bebas dan ditubuhkan sewajarnya.
2. FAM hendaklah mematuhi sepenuhnya, begitu juga Ahli, Pemain, Pegawai dan Perantara serta ejen perlawanan juga akan mematuhi apa-apa keputusan muktamad yang diluluskan oleh badan FIFA atau CAS.
3. Ahli hendaklah bersetuju untuk mengiktiraf CAS sebagai pihak berkuasa kehakiman yang bebas dan memastikan Ahli atau Pasukan, Pemain dan Pegawainya mematuhi keputusan yang diputuskan oleh CAS. Obligasi yang sama terpakai kepada Perantara dan ejen perlawanan.

**BAHAGIAN V KEWANGAN****Artikel 72 Tempoh Kewangan**

1. Tempoh kewangan FAM adalah setiap tahun dan bermula pada setiap 1 Januari tahun berkenaan dan berakhir pada 31 Disember pada tahun yang sama.
2. Pendapatan dan perbelanjaan FAM hendaklah diuruskan supaya seimbang sepanjang tempoh kewangan tersebut. Tugas utama FAM pada masa depan hendaklah terjamin dengan adanya simpanan.
3. Bendahari bertanggungjawab menyusun akaun tahunan disatukan bagi FAM dengan subsidiarinya seperti pada 31 Disember.

**Artikel 73 Pendapatan**

1. Pendapatan FAM diperoleh secara khususnya daripada:
  - i) yuran tahunan Ahli;
  - ii) penerimaan yang diperoleh daripada hak pemasaran yang menjadi hak FAM;
  - iii) denda yang dikenakan oleh badan yang dibenarkan;
  - iv) yuran dan penerimaan lain yang diterima selaras dengan objektif yang ingin dicapai oleh FAM;
  - v) wang yang dikumpul atau dipinjam mengikut cara yang difikirkan sesuai oleh Kongres dan untuk mencagarkan, menggadaikan atau memberikan lien atau cagaran lain ke atas seluruh atau sebahagian aku janji, harta dan aset FAM bagi maksud dan dalam keadaan tertentu berdasarkan terma dan syarat seperti yang difikirkan sesuai oleh Kongres;
  - vi) semua wang yang dikumpul dan keuntungan yang terakru kepada FAM daripada penyertaannya dalam mana-mana perniagaan dan menggunakannya semata-mata untuk tujuan mendorong, menggalakkan dan melaksanakan objektif FAM dan tiada mana-mana bahagiannya yang boleh dibayar melalui dividen, bonus atau keuntungan kepada mana-mana Ahli, pegawai, pekerja atau mana-mana pihak ketiga. Dengan syarat tiada apa-apa pun yang dinyatakan atau yang terkandung dalamnya boleh menghalang pembayaran secara ikhlas atau membayar ganjaran atau perbelanjaan atau kedua-duanya kepada mana-mana Ahli, pegawai, pekerja atau pihak ketiga bagi perkhidmatan yang benar-benar dilakukan oleh mereka untuk FAM.

**Artikel 74 Perbelanjaan**

1. FAM menanggung:
  - i) perbelanjaan yang dinyatakan dalam belanjawan;
  - ii) perbelanjaan lain yang diluluskan oleh Kongres dan perbelanjaan yang mesti ditanggung oleh Jawatankuasa Eksekutif dalam skop kuasanya;
  - iii) pembayaran sumbangan dana FAM kepada mana-mana badan kebajikan atau tabung, kelab atau institusi lain mengikut cara seumpamanya yang dianggap baik oleh Kongres;
  - iv) segala perbelanjaan lain selaras dengan objektif yang ingin dicapai oleh FAM.

**Artikel 75 Juruaudit Bebas**

Juruaudit bebas yang dilantik oleh Kongres hendaklah mengaudit akaun yang diluluskan oleh Jawatankuasa Kewangan dan Pengurusan menurut prinsip perakaunan yang sewajarnya dan membentangkan laporan kepada Kongres. Juruaudit hendaklah dilantik oleh Kongres bagi tempoh selama empat (4) tahun. Mandat ini boleh diperbaharui.

**Artikel 76 Yuran Keahlian**

1. Yuran Keahlian perlu dibayar pada 1 Januari setiap tahun. Yuran tahunan bagi Ahli baru untuk tahun berkenaan hendaklah dibayar dalam tempoh tiga puluh (30) hari dari tarikh penutupan Kongres semasa ahli itu diterima masuk.
2. Yuran kemasukan setiap Ahli baharu ialah Ringgit Malaysia: Lima Puluh Ribu Ringgit (RM 50,000.00) sahaja.
3. Yuran tahunan bagi setiap Ahli ialah Ringgit Malaysia: Lima Ribu Ringgit Sahaja (RM 5, 000.00) setahun yang perlu dibayar pada 1 Januari atau semasa diterima menjadi Ahli.

**Artikel 77 Penyelesaian**

FAM hendaklah mendebitkan mana-mana akaun Ahli untuk menyelesaikan tuntutan.

**Article 78 Levi**

1. Ahli atau ahli gabungannya termasuk Kelab atau Pasukan hendaklah membayar levi kepada FAM bagi setiap perlawanan bola sepak yang dibenarkan dan diluluskan oleh FAM.



2. Levi perlu dikira berdasarkan pendapatan kasar kutipan tiket, pas bermusim dan lain-lain bentuk pas tahunan yang dikeluarkan oleh Pasukan Tuan Rumah dan perlu dibayar kepada FAM dalam tempoh yang ditetapkan.
3. Ahli atau ahli-ahli gabungannya termasuk Kelab atau Pasukan yang gagal mengemukakan bayaran levi yang ditetapkan di atas atau apa-apa tanggungjawab kewangan yang lain kepada FAM dalam tempoh yang ditetapkan akan menyebabkan Ahli yang bertanggungjawab kehilangan hak untuk menghadiri Kongres dan untuk membuang undi mereka.

#### **Artikel 79 Harta**

1. Harta alih FAM hendaklah terletak hak atas nama FAM dan hendaklah dilaksanakan melalui keputusan yang diluluskan dalam mesyuarat Jawatankuasa Eksekutif.
2. Harta tak alih FAM hendaklah didaftarkan atas nama FAM. Semua surat cara yang berkaitan dengan harta tersebut hendaklah dilaksanakan oleh Presiden, Setiausaha Agung dan Bendahari FAM pada masa itu.
3. Apa-apa harta tak alih FAM tidak boleh dijual, dipajak, digadai janji atau dipindah milik tanpa izin dan kuasa Kongres. Harta tak alih FAM hanya boleh diuruskan menurut resolusi yang diluluskan oleh Kongres sahaja.
4. Walau bagaimanapun tiada pelupusan, jualan, pindah milik dan/atau pajakan dalam apa jua bentuknya yang boleh diluluskan dalam mesyuarat Kongres yang dalam Kongres ini resolusi mestilah menerima dengan undi mutlak (50% +1) daripada Ahli yang hadir dan layak mengundi bersetuju. Walau apa pun yang berlawanan yang terkandung dalam peruntukan ini, proviso ini tidak terpakai kepada harta tak alih yang dikelaskan dan dikategorikan serta yang disifatkan oleh Jawatankuasa Kewangan dan Pengurusan sebagai aset perniagaan FAM.

**BAHAGIAN VI PERUNTUKAN AKHIR****Artikel 80 Fasal Tafsiran**

Jika timbul apa-apa kesamaran atau pertikaian berhubung dengan tafsiran Statut, kod, peraturan-peraturan, kaedah dan undang-undang kecil FAM, maka keputusan Kongres tentang perkara itu adalah muktamad dan tidak boleh dipertikaikan dalam mana-mana mahkamah biasa atas cadangan badan yang menerima pakai dokumen undang-undang berkenaan.

**Artikel 81 Keadaan Luar Jangka Yang Tidak Diduga dan Force Majeure**

Jawatankuasa Eksekutif hendaklah mempunyai keputusan muktamad tentang apa-apa perkara yang tidak diperuntukkan dalam Statut atau dalam hal *force majeure*.

**Artikel 82 Sumbangan kepada Media**

Presiden atau Setiausaha Agung atau mana-mana Pegawai yang dibenarkan oleh Jawatankuasa Eksekutif boleh membuat kenyataan atau sumbangan kepada Media dengan syarat tidak:-

1. Menyentuh atau menyampaikan kilanan, rungutan, menyampaikan perasaan tidak puashati atau mengecam mengenai urusan pentadbiran hal-ehwal FAM atau pengelolaan Liga Malaysia atau lain-lain pertandingan yang direstui atau diluluskan oleh FAM;
2. Memperlekehkan, mengancam, memperkecilkan, merungut, mempersoalkan, atau mempertikaikan prestasi mana-mana Pegawai;
3. Bercanggah, mempertikaikan, mempersoal, atau fakta yang diberikan adalah tidak tepat atau bercanggah atau salah dengan mana-mana keputusan-keputusan Badan FAM mengikut Artikel 21, Statut FAM iaitu keputusan Kongres, Jawatankuasa Eksekutif, Presiden, Jawatankuasa Darurat, Jawatankuasa Tetap, Sekretariat Agung dan Badan Kehakiman FAM;
4. Mengugut FAM atau Pertandingan;
5. Mempunyai niat bertujuan menghina, mengaibkan, menjatuhkan atau mencemar imej Pegawai, FAM atau memperlekehkan mana-mana Pegawai FAM atau Pegawai Ahli; atau
6. Bercanggah dengan mana-mana Peraturan FAM atau yang ditentukan oleh Jawatankuasa Eksekutif dari semasa ke semasa.

**Artikel 83 Pembubaran**

1. Apa-apa keputusan berhubung dengan pembubaran FAM memerlukan majoriti dua per tiga (2/3) daripada seluruh Ahli FAM, yang mesti diperoleh dalam Kongres yang diadakan khusus bagi tujuan tersebut.
2. Jika FAM dibubarkan, asetnya hendaklah dipindahkan kepada Pemegang Amanah Raya. Pemegang Amanah Raya hendaklah memegang aset ini sebagai amanah, “bonus pater familiae” sehingga FAM diwujudkan semula. Walau bagaimanapun, Kongres terakhir boleh memilih penerima lain aset tersebut berdasarkan majoriti dua per tiga (2/3).

**Artikel 84 Notis Mesyuarat**

1. Setiausaha Agung hendaklah memberi sekurang-kurangnya empat puluh lima (45) hari notis kepada semua Ahli berkenaan dengan tempat, tarikh dan masa bagi setiap Kongres Tahunan atau Kongres Luar Biasa. Notis itu hendaklah disifatkan telah diberikan dengan sewajarnya kepada mana-mana Ahli jika dihantarkan ke alamat Ahli terakhir yang diketahui.
2. Notis bagi mesyuarat Jawatankuasa Eksekutif hendaklah diberikan sekurang-kurangnya tujuh (7) hari genap sebelum tarikh mesyuarat itu diadakan.
3. Notis bagi Mesyuarat Jawatankuasa Tetap dan lain lain jawatankuasa hendaklah diberikan sekurang-kurangnya tiga (3) hari sebelum tarikh mesyuarat itu diadakan.

**Artikel 85 Kuorum bagi Mesyuarat**

Kuorum bagi mesyuarat adalah:

1. Kongres Tahunan atau Kongres Luar Biasa – lebih separuh daripada jumlah Ahli yang layak mengundi.
2. Jawatankuasa Eksekutif – lebih daripada separuh bilangan ahli Jawatankuasa.
3. Kuorum bagi mesyuarat Jawatankuasa Darurat, Jawatankuasa Tetap atau mana-mana jawatankuasa yang lain, Tribunal atau Suruhanjaya yang boleh dilantik oleh Jawatankuasa Eksekutif, dari semasa ke semasa, hendaklah lebih daripada separuh



bilangan Ahli yang menganggotai Jawatankuasa, Tribunal atau Suruhanjaya itu dengan syarat kuorum bagi Jawatankuasa Kewangan dan Pengurusan hendaklah sekurang-kurangnya separuh dari bilangan ahli Jawatankuasa itu.

**Artikel 86 Kehadiran dalam Mesyuarat**

1. Ahli Jawatankuasa yang gagal untuk menghadiri tiga (3) mesyuarat mengikut mana-mana yang berkenaan, sebanyak tiga (3) kali berturut-turut, akan dilucut keahliannya dalam Jawatankuasa itu secara automatik melainkan jika Jawatankuasa berpuas hati dengan sebab ketidakhadirannya dan ketidakhadirannya itu berasas atau boleh diterima oleh Jawatankuasa Eksekutif.
2. Jawatankuasa boleh, mengikut budi bicara mutlaknya, memutuskan untuk membenarkan ahli Jawatankuasa mencadangkan mana-mana individu yang dilucutkan keahliannya dalam Jawatankuasa tersebut digantikan, mengikut mana-mana yang berkenaan, dengan individu lain.

**Artikel 87 Perkara yang Tidak Dinyatakan**

Semua perkara yang tidak dinyatakan dalam Statut hendaklah diselesaikan oleh Jawatankuasa Eksekutif kecuali diputuskan sebaliknya oleh Kongres.

**Artikel 88 Penguatkuasaan**

Statut ini telah diluluskan di dalam Kongres di Petaling Jaya pada 29 Ogos 2020 dan akan mula berkuatkuasa pada 29 Ogos 2020.

**STUART RAMALINGAM**  
Setiausaha Agung

**DATUK HAJI HAMIDIN BIN HAJI MOHD AMIN**  
Presiden

**PERATURAN MENGAWAL PENGGUNAAN STATUT FAM****ARTIKEL 1 PENERBITAN DAN PINDAAN KEPADA PERATURAN**

1. Jawatankuasa Eksekutif hendaklah mempunyai kuasa untuk menerbitkan dan meminda semua tetapi tidak terhad kepada Peraturan FAM seperti yang berikut:
  - a) Peraturan Organisasi FAM;
  - b) Kod Pemilihan FAM;
  - c) Kod Tata tertib FAM;
  - d) Peraturan Pelesenan Kelab FAM;
  - e) Peraturan Status dan Perpindahan Pemain FAM;
  - g) Peraturan Majlis Resolusi Pertikaian Kebangsaan;
  - h) apa-apa peraturan yang berkaitan dengan Pertandingan, termasuk tetapi tidak terhad kepada:
    - i) Peraturan-Peraturan Pertandingan; dan
    - ii) Peraturan-Peraturan Komersil/Pemasaran;
  - i) Apa-apa peraturan yang difikirkan perlu.
2. Sekiranya Jawatankuasa Eksekutif memilih untuk memaklumkan peraturan ini (dan mana-mana Peraturan yang lain), hendaklah dimaklumkan secara umum di laman web FAM atau mana-mana platform yang lain.

**ARTIKEL 2 KONFLIK KEPENTINGAN**

1. Mana-mana individu yang menerima imbuhan disebabkan oleh suatu kontrak daripada Ahli atau ahli gabungan kepada Ahli atau mana-mana Kelab tidak berhak untuk menerima sebarang pekerjaan yang mendapat gaji dengan Ahli lain pada masa yang sama.

**ARTIKEL 3 PERTANDINGAN**

1. FAM menganjurkan dan menyelaras pertandingan rasmi yang diadakan dalam bidang kuasanya:
  - a) Piala Sumbangsih;
  - b) Liga Super;
  - c) Liga Premier;
  - d) Piala FA



- e) Piala Malaysia;
  - f) Piala Presiden;
  - g) Piala Belia;
  - h) Malaysia Premier Futsal League;
  - i) Piala Tun Sharifah Rodziah;
  - j) Liga SupaRimau;
  - k) Mana-mana pertandingan lain yang diluluskan dan/atau diiktiraf oleh FAM atau yang dianggap sesuai selaras dengan Peraturan FIFA dan AFC.
2. Jawatankuasa Eksekutif boleh memberi kuasa kepada Jawatankuasa Pertandingan atau Ahli atau pihak ketiga untuk mengelola dan menganjurkan pertandingan peringkat bawah umur. Pertandingan ini tidak boleh mengganggu pertandingan yang dianjurkan oleh FAM seperti di Artikel 3.1. Jawatankuasa Eksekutif juga boleh mewakili memberi kuasa hak pengurusan dan penganjuran liga atau pertandingan di bawah Artikel 3.1 kepada pihak ketiga melalui satu perjanjian bertulis.
  3. Jawatankuasa Eksekutif boleh mengeluarkan Peraturan Khas mengenai perkara ini.
  4. Ahli, ahli gabungan kepada Ahli, Pasukan atau mana-mana badan bola sepak atau badan bukan bola sepak tidak dibenarkan untuk menjadi tuan rumah atau menganjurkan apa-apa aktiviti bolasepak di peringkat kebangsaan atau antarabangsa tanpa terlebih dahulu mendapat kelulusan rasmi daripada FAM.

#### **ARTIKEL 4 HAK**

1. FAM dan Ahlinya adalah pemilik asal semua hak-hak yang berkaitan dengan pertandingan yang termasuk di bawah bidang kuasa masing-masing. Hak tersebut mestilah mengikut ketetapan yang diberikan oleh Jawatankuasa Eksekutif tanpa apa-apa sekatan terhadap kandungan, masa, tempat dan undang-undang. Hak-hak ini termasuk, antara lain, segala jenis hak kewangan, audiovisual dan rakaman radio, hak pengeluaran semula dan hak penyiaran, hak multimedia, pemasaran dan promosi dan hak zahir seperti lambang dan hak-hak yang timbul di bawah undang-undang hak cipta.
2. Jawatankuasa Eksekutif hendaklah memutuskan bagaimana dan sejauh mana hak-hak ini digunakan untuk tujuan ini. Jawatankuasa Eksekutif hendaklah membuat keputusan secara bersendirian sama ada hak-hak ini hendaklah digunakan secara eksklusif, atau secara bersama dengan pihak ketiga atau sepenuhnya melalui pihak ketiga.

**ARTIKEL 5 PENGESAHAN**

1. FAM dan ahli-ahlinya adalah secara eksklusif bertanggungjawab untuk membenarkan pendedaran imej dan audio dan pembawa data lain perlawanan Bolasepak dan acara-acara yang termasuk di bawah bidang kuasa masing-masing, tanpa apa-apa sekatan ke atas kandungan, masa, tempat dan aspek-aspek teknikal dan undang-undang.

**ARTIKEL 6 PERLAWANAN DAN PERTANDINGAN ANTARABANGSA**

1. Hak untuk menganjurkan perlawanan dan pertandingan tempatan dan antarabangsa yang melibatkan penyertaan pasukan tempatan dengan pasukan dari luar negara yang berdaftar secara mutlak dengan mana-mana ahli FIFA hendaklah mendapat kelulusan terlebih dahulu daripada Jawatankuasa Eksekutif. Kelulusan permohonan mestilah mengikut prosedur yang diperuntukan dalam Peraturan Mengawal Perlawanan Antarabangsa FIFA dan FAM.
2. FAM adalah terikat untuk mematuhi kalendar perlawanan antarabangsa yang disusun oleh FIFA.

**ARTIKEL 7 HUBUNGAN**

FAM tidak boleh mengadakan perlawanan atau membuat hubungan kesukuan dengan persatuan yang bukan ahli FIFA atau dengan ahli sementara sesuatu konfederasi tanpa kelulusan FIFA.

**ARTIKEL 8 KELULUSAN**

Mana-mana Ahli, ahli gabungan kepada Ahli atau Kelab yang bernaung di bawah FAM tidak boleh bergabung atau mengambil bahagian dalam pertandingan mana-mana persatuan lain (negara lain) tanpa kebenaran FAM.

**ARTIKEL 9 PERANTARA DAN EJEN PERLAWANAN**

1. Penggunaan ejen perlawanan dalam menguruskan perlawanan adalah dibenarkan.
2. Ejen perlawanan yang menguruskan perlawanan yang melibatkan pasukan atau pasukan-pasukan dari FAM mestilah diiktiraf secara rasmi oleh FIFA.
3. Ejen perlawanan yang menguruskan perlawanan antara pasukan yang melibatkan pasukan atau pasukan-pasukan dari FAM dengan konfederasi yang berbeza hendaklah mempunyai lesen ejen FIFA yang sah.
4. Pemain dan Pasukan berhak untuk menggunakan khidmat Perantara yang sah dan berdaftar dengan FAM apabila menandatangani kontrak pemain dan/atau perjanjian perpindahan. Perkhidmatan tersebut mestilah mematuhi Peraturan FAM yang berkaitan dengan Perantara.

**ARTIKEL 10           UNDANG-UNDANG PERMAINAN**

1.     FAM dan setiap ahli-ahlinya yang bermain bola sepak mestilah mematuhi Undang-undang Permainan yang dikeluarkan oleh IFAB. Hanya IFAB boleh mengeluarkan dan mengubah Undang-undang Permainan.
2.     FAM dan setiap ahli-ahlinya yang bermain futsal dan bola sepak pantai selaras dengan Undang-Undang Permainan Futsal dan Undang-undang Permainan Bola Sepak Pantai. Hanya IFAB boleh mengeluarkan dan mengubah Undang-Undang Permainan Futsal dan Bola Sepak Pantai.

**ARTIKEL 11           HAL-HAL YANG TIDAK DIPERUNTUKKAN**

Apa-apa perkara yang tidak diperuntukkan dalam Peraturan-Peraturan ini hendaklah diputuskan oleh Jawatankuasa Eksekutif.

**ARTIKEL 12           PENGUATKUASAAN**

Peraturan Mengawal Pemakaian Statut ini telah diluluskan oleh Kongres FAM pada 29 Ogos 2020.

Bagi pihak Kongres FAM 2020

**STUART RAMALINGAM**  
Setiausaha Agung

**DATUK HAJI HAMIDIN BIN HAJI MOHD AMIN**  
Presiden

**PERATURAN TETAP KONGRES FAM****ARTIKEL 1 PENERUS**

1. Presiden FAM akan meneruskan Kongres. Salah satu daripada Timbalan Presiden akan menggantikannya dalam kes ketiadaan Presiden.
2. Penerus hendaklah:
  - a) bertanggungjawab terhadap penggunaan Peraturan Tetap yang ketat;
  - b) membuka dan menengahkan sesi dan perbincangan;
  - c) membenarkan perwakilan untuk bercakap;
  - d) menjalankan prosiding Kongres;
  - e) mengekalkan kawalan di Kongres; dan
  - f) mengenakan tindakan tata tertib kepada perwakilan yang mengganggu prosiding atau bersalah atas salah laku.

**ARTIKEL 2 LANGKAH TATATERTIB**

1. Dalam menjalankan hal berkaitan Kongres, Penerus berhak untuk memakai langkah-langkah tata tertib seperti yang berikut:
  - a) panggilan untuk mengawal;
  - b) mengecam; dan/atau
  - c) pengecualian daripada satu atau lebih sesi.
2. Dalam hal rayuan, Kongres hendaklah memutuskan dengan segera dan tanpa perdebatan.

**ARTIKEL 3 PEMILIHAN PEGAWAI**

1. Setiausaha Agung bertanggungjawab untuk mencatat minit Kongres. Mana-mana individu boleh dipanggil untuk membantu Setiausaha Agung.
2. Mengikut Artikel 24 Statut FAM, Penerus dan ahli Jawatankuasa Pemilihan FAM akan dilantik oleh Kongres untuk tujuan pemilihan Jawatankuasa Eksekutif.
3. Tiga (3) Ahli hendaklah dilantik mengikut Artikel 24 FAM Statut untuk memeriksa minit rasmi Kongres.

**ARTIKEL 4 PERINTAH PROSEDUR**

1. Setiap perbincangan mengenai perkara-perkara dalam agenda hendaklah didahului dengan pernyataan:
  - a) oleh Pengerusi atau Ahli yang ditetapkan oleh Jawatankuasa Eksekutif untuk tujuan ini; dan/atau
  - b) oleh wakil Jawatankuasa yang dilantik khas untuk membuat laporan; dan/atau
  - c) oleh wakil Ahli yang bertanggungjawab untuk memasukkannya ke dalam Agenda.
2. Perbincangan umum akan dibuka kepada para perwakilan.
3. Hak untuk berucap dalam Kongres akan diberikan mengikut turutan. Tiada perwakilan akan berucap melainkan kebenaran telah diperolehi dan hendaklah berucap dari tempat yang ditetapkan.

**ARTIKEL 5 CADANGAN DAN USUL**

1. Semua cadangan dan pindaan hendaklah dikemukakan secara bertulis. Cadangan yang tidak berkaitan dengan subjek yang dibincangkan akan ditarik balik daripada perbahasan.
2. Sekiranya usul penangguhan dicadangkan, semua perbincangan akan digantung sehingga undian telah diambil atas usul tersebut.
3. Cadangan untuk menutup perbincangan hendaklah dikemukakan tanpa perdebatan. Jika usul itu diluluskan, kebenaran untuk bercakap hanya akan diberikan kepada Ahli-Ahli yang memohon untuk berbuat demikian sebelum undi telah diambil.
4. Pengerusi akan menutup perbincangan melainkan jika Kongres memutuskan sebaliknya dengan majoriti mudah.

**ARTIKEL 6 UNDIAN**

1. Tiada undi boleh diambil secara undi rahsia kecuali seperti yang diperuntukan selainnya dalam Statut.
2. Semua usul boleh diputuskan sama ada dengan mengangkat tangan, penggunaan peralatan elektronik, dengan memanggil nama atau aklamasi seperti yang diperuntukkan dalam peraturan ini. Tiada seorang pun boleh dipaksa untuk mengundi.
3. Sebarang usul yang memerlukan kelulusan majoriti akan dianggap telah diterima pakai jika ianya dicadang dan disokong tanpa sebarang bantahan.



4. Semua usul hendaklah dikemukakan mengikut susunan yang dikemukakan. Setiap Ahli yang mengundi hanya mempunyai satu usul sahaja.
5. Sebelum setiap undian, Pengerusi atau individu yang ditetapkan olehnya untuk perkara tersebut hendaklah membaca dengan jelas usul itu sebelum mengundi dan menerangkan prosedur pengundian kepada Kongres.
6. Tertakluk kepada Artikel 6 (3) sekiranya proses undian dilaksanakan, pengundian hendaklah dijalankan dengan mengangkat tangan atau apa-apa cara yang ditetapkan oleh Sekretariat Agung.
7. Pengubahan kepada pindaan hendaklah dimasukkan atau dibincangkan untuk sebelum diundi.
8. Pengerusi hendaklah mengesahkan dan mengumumkan keputusan pengundian kepada Kongres.
9. Ketenteraman akan diperhatikan semasa pengundian dan sehingga keputusan telah diumumkan oleh Pengerusi. Tiada individu dibenarkan untuk berucap semasa mengundi dan sehingga hasilnya diumumkan.

#### **ARTIKEL 7 PEMILIHAN**

1. Pemilihan hendaklah dijalankan mengikut peruntukan Kod Pemilihan FAM.
2. Setiausaha Agung hendaklah menyimpan dalam Sekretariat Agung semua dokumen yang dikehendaki untuk diarkibkan menurut Kod Pemilihan FAM untuk tempoh seratus (100) hari selepas berakhirnya Kongres, atau masa yang kemudian seperti yang diarahkan oleh Jawatankuasa Eksekutif, di mana waktu itu ia akan dihapuskan.

#### **ARTIKEL 8 PERKARA YANG TIDAK DINYATAKAN**

1. Semua perkara yang tidak diperuntukkan dalam Peraturan Tetap yang tidak berkaitan dengan pemilihan akan diselesaikan oleh Jawatankuasa Eksekutif melainkan jika ditentukan oleh Kongres.
2. Semua perkara yang tidak diperuntukkan dalam Peraturan Tetap yang berkaitan dengan pemilihan hendaklah diselesaikan mengikut Kod Pemilihan FAM.

#### **ARTIKEL 9 PENGUATKUASAAN**

Peraturan Tetap Kongres telah diluluskan oleh Kongres FAM pada 29 Ogos 2020 di Petaling Jaya, Selangor. Peraturan Tetap ini menggantikan semua Peraturan Tetap sebelumnya dan berkuatkuasa pada 29 Ogos 2020.

Bagi pihak Kongres FAM 2020

**STUART RAMALINGAM**

Setiausaha Agung

**DATUK HAJI HAMIDIN BIN HAJI MOHD AMIN**

Presiden



**FAM**

---

**PERSATUAN BOLASEPAK MALAYSIA**

Wisma FAM, Jalan SS5A/9  
Kelana Jaya, 47301, Petaling Jaya  
Selangor Darul Ehsan  
Malaysia  
Tel : 03-78733100 Fax : 03-78757984